

Cœn sə zɔfay ana Yuhana

Adakay way pə deftere a anan

Sə vinde anan deftere a anan nà, Yuhana dɔ maslan a Yesu ata awan. A vinde anan nà, à alay a dɔ a Yesu ahay tinen à dæce inde anga dɔ ahay tinen apan ti ga atan alay ata awan. Yuhana a vinde nà, way anahan sə canan Mbərom a kan anan à cœn sə zɔfay inde ataya awan. Deftere a anan a dɔakay anan nà, way saa tɛra à alay a daliyugo i saa ndav ataya awan. A andav inde nà, Yesu kə mbasak pə Fakalaw, aday kə ndakak daliyugo wiya awan, bagəbaga mburom wiya re, aday Mbərom i njahay uda tu dɔ anahan ahay pa sə viyviya awan.

Nga sa 'am ahay

Adazlan anahan awan (1.1-8)

Adakay way anga egliz ahay cuwɔe ataya awan
(1.9 - 3.22)

Atə Mbərom ta wan sə təman (4.1 - 5.14)

Ti kwahak anan mətətɔk ahay cuwɔe (6.1 - 8.5)

Ti fa məzləzlilen ahay cuwɔe (8.6 - 11.19)

Do manidɛ a Mbərom ahay (12.1 - 13.18)

Sariya a Mbərom (14.1 - 16.21)

Mbərom a mbasay pu dɔ manidɛ anahan ahay
(17.1 - 20.15)

Mbərom a ndakay way wiya aya miza awan
(21.1 - 22.6)

Andav sa 'am ahay (22.7-21)

Adazlan anahan awan

¹ Way ana Yesu Almasihu sa ka anan ataya nà, tinen həna. Mbərom a jan anà Yesu à kan anan

anà dɔ si mer su way anahan ahay, aday tâ san anan way a sa naa tɛra bɛse ataya awan. Anga nan kutok, Yesu Almasihu a slɛnay ahay maslay a Mbɛrom sa kan anan way a anaya awan, anà Yuhana, dɔ si mer su way anahan.

² Natiya awan, Yuhana a side anan pa 'am sɛ dɔ ahay, way anahan sɛ canan ataya fok tɛ dɛdem awan. Kawa sa ja nà, a tɛker anan 'am a Mbɛrom, tɛ way ana Yesu Almasihu sɛ dɛkay anan ataya fok.

³ Mbɛrom i dɛf alay sɛ mazlaɓ anahan pu dɔ sɛ jinge anan 'am a anan pa 'am sɛ dɔ ahay ata awan. I dɛf alay sɛ mazlaɓ anahan pu dɔ sa pak slɛmay pa 'am a anan aday sa dɛf apan nga ata re. Anga alay ana way ataya i tɛra ata nà, i sla hɛna bɛse coy.

Yuhana a jan ayak 'am anà egliz sɛ wulen su doh ahay cuwɛ

⁴⁻⁵ Sɛ vindɛk ayak 'am a anan nà, nen Yuhana. Na jan ayak 'am anà egliz ahay cuwɛ pɛ daliyugo sɛ Aziya.

Sumor a Mbɛrom tɛ zay anahan â ga inde tɛ kwanay a fok. Atɛ Yesu Almasihu tɛ apasay ahay cuwɛ tinen mɛ njahay a pa 'am a Mbɛrom ataya dɛkwen, tâ varak ikwen asan zek tɛ zay a tinen re.

Mbɛrom nà, winen inde kwa hɛna kabay, winen inde hɛna, aday azana pa 'am dɛkwen, winen a re.

Yesu Almasihu nà, dɔ sɛ side dɛdem awan. Winen dɔ sɛ lahan pa 'am anà dɔ ahay sɛ slabakay à mɛke wa, aday winen dɛkwen Bahay a pa nga sɛ bahay sɛ daliyugo ahay fok. Winen dɛkwen a pɛlay mɛnuko. Anga nan, kɛ mɛcak anga mɛnuko re. Tɛ mez anahan, a tɛmay ahay mɛnuko ï ines a mɛnuko ahay wa.

⁶ A tɛra mənuko, dɔ anahan ahay à bahay anahan inde. A tɛra mənuko dɔ sa gan mer su way anà Bəbay anahan Mbərom. Dɔ ahay fok tɛ hɛran nga anga mazlaɓ anahan tɛ mɛgala anahan pa sɛ viyviya awan. Amen!

⁷ Cen idɛ à mburom! Yesu nà, i nay ahay à matapasl inde. Dɔ ahay fok, ti canan tɛ idɛ a tinen, aday kwa dɔ sa ndaz anan ataya dukwen ti i canan tɛ idɛ a tinen ahay re. Zahav sɛ dɔ ahay pə daliyugo ahay fok ti yiman. Acəkan. Amen!

⁸ Bahay Mbərom, Ba Mɛgala, a ja nà: «Sɛ dazlan anà way ahay fok nà, nen awan. Aday saa ndav anan wa way ahay fok dukwen, nen a re.»

Mbərom nà, winen inde kwa hɛna kabay, winen inde hɛna, aday azana pa 'am dukwen, winen a re.

Yuhana a canan anà Yesu kawa i cœn sə zʊbaj inde

⁹ Nen nɛ Yuhana, mɛrak a kwanay. Nen dukwen mɛ japay tɛ Yesu nà, kawa kwanay a fok. Mbərom a ga puko bahay nɛ pə kɛrtek awan. Natiya na ga dɛce anga 'am a Mbərom dukwen kawa kwanay awan, dɛ sɛmen dukwen pə kɛrtek a re.

Nen, nɛ wazay anan 'am a Mbərom. Nɛ tɛtakan anan lɛbara ana Yesu anà dɔ ahay. Anga nan kutok asanaw nà, ta ban nen, tɛ dɛfay ahay nen à Patmos, ù kon a à mamasl sɛ a'am inde ata awan.

¹⁰ Apasay Cəncan a a nay ahay upo, pac sɛ Zlaba a inde. Aday dundo a ndəray ahay à dɛba uno wa, kawa mɛzlɛzlilen.

¹¹ 'Am a a ndəray à dundo ata wa, a wa: «Way a iken saa canan ata nà, vinde anan pə dɛrewel,

aday slan anan anà egliz ahay cuwɓe: à Efesus, à Samirna, à Pərgam, à Tiyatira, à Sardis, à Filadelfiya, aday à Lawdikiya.»

¹² Nə sləne anan cəna, nə mbəda 'am aday ni ca pə dowan a su jo ahay 'am ata awan, nə canan nà, anà lalam ahay ma daf aya pə way ahay cuwɓe, mə ndakay aya dukwen tə gura. ¹³ Nə canan anà awan a inde, winen kawa do, à wulen sə way sa daf lalam ataya inde re. Zana anahan pi zek kawa rəkot hus pə gudəba, aday winen ma ɓan dəginəginə a hərəp tə maslərəpa sə gura.

¹⁴ Sibɓek sa nga anahan a ca kawa gugumay herre. Idə anahan ahay ta dav nə kawa miresl sə uko.

¹⁵ Saray anahan ahay dukwen ta dav kawa ndəfəre mə gəbay a u uko wa ata awan. A ja 'am dukwen, a ndar kawa zəlaka sə dazay à zylinder pə pəkərad ata awan.

¹⁶ Dowan ata nà, mawuzlawazl ahay cuwɓe inde à alay puway anahan, maslalam ma pa awan, a zləray ahay à 'am anahan wa mbeet. Idə anahan a dav nə kawa pac sa dav man ipec ata awan.

¹⁷ Nə canan cəna, nə slahay duboz pa 'am anahan, kawa nen ma mac awan, əna a daf upo alay puway, u jo: «Kê jəjar bay! Sə dazlan anà way ahay fok nà, nen awan, aday saa ndav anan way ahay fok dukwen, nen a re.

¹⁸ Nen nà, Do sə Sifa. Nə məcak, aday həna nen tə sifa pa sə viyviya awan. Nə lavan nga anà Amac tə Məke anahan a təke.

¹⁹ Natiya kutok, vinde anan way anak sə canan, way sə təra həna, aday way saa təra azana pa 'am ataya re.

²⁰ Ni dākak anan 'am ana mawuzlawazl a iken sə canan à alay puway uno inde, tinen cuwbe ataya awan, tə way sə lalam a cuwbe mə ndakay aya tə gura ataya awan. San nà, mawuzlawazl a cuwbe ataya nà, tinen nə maslay a Mbərom sa ba pə egliz ahay cuwbe ataya awan. Way sə lalam a cuwbe ataya dūkwen, tinen nə egliz a cuwbe ataya re.»

2

Derewel anga egliz à Efesus

¹ Dowan ata awan u jo asa, a wa: «Vinden ayak anà maslay a Mbərom a à egliz à Efesus ata nà, natiya: Nen Yesu nà, nen dōwan a mawuzlawazl ahay à alay puway anahan inde cuwbe ata awan, nen apan ni bar à wulen sə way sə lalam ahay inde cuwbe mə ndakay aya tə gura ata re.

² «Həna a anan nà, 'am uno awan: Na san mer su way anak a sa ga anga nen ataya zle. Kə pəruho azar tə dəcə awan, əna kə səmak anan, bina kə mbəsakak anan mer su way ataya bay. Aday na san zle, kə təmahak dō sə sədøk ahay sə njahay à wulen a kwanay inde aday sa ga mer tə kwanay bay. Anga ta ja nà, tinen dō maslan a Yesu ahay, əna kə sənək atan, tinen dō sə mungwalay ahay bina, nen nə slənək atan ayak bay.

³ Kə hawak atan bay, kə səmen anà dəcə ahay nà, anga nen awan.

⁴ «Aya əna, way inde ni gafak apan 'am: Kə pəlay nen həna kawa ananak sə dazlan kurre ata sabay.

⁵ Natiya, bayak pə asan zek anak a kurre ata aday, ca apan, ka mak à dəba jiya awan, mbəsak ines anak ata awan, aday ga kawa ananak a kurre

ataya awan. Bay nà, ni zlak ayak àga iken, ni gəba anan way sə lalam anak ata awan.

⁶ «Ta day maza kəmayə, iken apan ki ga mer su way lele awan, ta sa nan ide anà mer su way mbala ana dō a Nikolay* ahay ata awan. Nen a dukwen na nan ide anà mer su way a tinen ata re.

⁷ «Natiya, dō aday sləmay inde apan nà, â sləne 'am ana Apasay Cəncan a sa jan anà egliz ahay ata awan. Anà dō sə mbasay pə dəcə ahay nà, ni varan cəved sa zla à jerne a Mbərom sa ban bumbok i sé sə varan sifa anà dō ahay ata wa, aday i pa.»

Derewel anga egliz à Samirna

⁸ Dowan ata u jo asa, a wa: «Vinden ayak anà maslay a Mbərom a à egliz à Samirna ata nà, natiya: Nen Yesu nà, nen dō sə dazlan anan way fok, aday sa ndav anan way ahay fok ata awan. Nə məcak, aday nə slabakak ahay à məke wa re.

⁹ «Na san dəcə anak a zle, na san mətawak anak ata zle re, əna tə didəm a nà, iken zlile awan. Lelibay sə dō ahay sa ja apak ata nà, na san anan zle. Dō ataya ta ja nà, tinen Yahuda ahay, aday cəkəbay ta gad mungwalay. Tinen nà, dō ana Fakalaw ahay cukutok.

¹⁰ «Ka saa jəjəran anà dəcə saa nay ahay apak ataya bay. Sləne 'am a anan: Fakalaw i ban dō ahay à wulen a kwanay wa, i zla atan à dangay aday sə katab anan adaf nga a kwanay pi nen. Dəcə ataya i təra nà, luvon kuro. Ban mivel. Kwa â ga nə 'am sa njad wa amac dəp nà, kə mbəsak anan adaf nga anak pi nen bay, anga ni varan magwagway

* **2:6** Nikolay ahay nà, tə sləfan sləmay anà dō ataya nà, à Deftere ana Yuhana a anan inde. Dowan a san awan maza patan bay.

anà do matana ataya awan, ti njad sifa sa ndav bay ata awan.

¹¹ «Natiya, do aday sləmay inde apan nà, â sləne 'am ana Apasay Cəncan a sa jan anà egliz ahay ata awan. Do sə mbasay pə dəcə ataya nà, i mac à məke sə mərda itəbay.»

Derewel anga egliz à Pərgam

¹² Dowan ata u jo asa, a wa: «Vinden ayak anà maslay a Mbərom a à egliz à Pərgam ata nà, natiya: Nen Yesu nà, nen dōwan a maslalam anahan inde ma pa ata awan.

«Həna anan nà, 'am uno awan:

¹³ Na san man sə njahay anak ata zle, man sa ga bahay ana Fakalaw. Ta vad Antipas, do sa taa dəkay anan 'am uno dukwen à man ata awan. Əna iken kə pərahak uno azar à alay ata tə dīdem awan, aday iken apan ki pəruho azar hwiya. Kə məmanak anan sləmay uno bay.

¹⁴ «Aya əna, way ahay inde dukwen ni gafak apan 'am: Do ahay inde àga iken, tinen apan ti pərahan azar anà atətak way ana Balama.† Balama ata a dakan anan anà Balak cəved sa njak anan Isəra'ila ahay aday t̄a ga ines. A njak atan sa rac sluwed sə pəra aday sa ga mədigwed re.

¹⁵ Matana re, do sə pərahan azar anà atətak way anà do a Nikolay ahay dukwen inde àga iken asa.

¹⁶ «Anga nan kutok, mbəsak ines anak ataya awan. Bay nà, ni zlak ayak bəse, nen tə maslalam a saa zləray ahay à 'am uno wa ata awan. Aday ni ga vərəm tə tinen kutok.

† 2:14 Ca pə Limle 31.16, 22.1 - 25.9.

17 «Natiya, dō aday sləmay inde apan nà, â sləne 'am ana Apasay Cəncan a sa jan anà egliz ahay ata awan: Anà dō sə mbasay pə dəcə ataya nà, ni varan magwagway. I njad way sa pa mi der a sə ngaman *manu* ata awan. Aday ni varan kon sə masitolok kwedekkwedek awan, sləmay wiya mə vinde apan. Dowan saa san sləmay ata nà, ibay, si dōwan a sə təma kon ata vərre.»

Derewel anga egliz à Tiyatira

18 Dowan ata u jo asa, a wa: «Vinden ayak anà maslay a Mbərom a à egliz à Tiyatira ata nà, natiya: Nen Yesu nà, nen dō aday idē anahan ahay ta dav nə kawa miresl sə uko ata awan, aday saray anahan ahay dūkwen mə ndərkesl aya kawa tə gəbāy ahay ndəfəre ù uko wa ata re. Həna anan nà, 'am uno awan.

19 «Way anak sa ga nà, na san zle. Na san asan zek anak tə adaf nga anak pi nen zle. Na san zle, ka gak anan mer su way anà dō ahay, aday kə rəzlek anan à nga wa sə pəruho azar re. Həna dūkwen, ka ga nə way sə zalay ananak sə dazlan ata asa.

20 «Aya əna, way inde nà, ni gafak apan 'am. Kə mbəsak anan uwar a sə ngaman Yezebel ata, winen apan i njak a dō ahay ta sa ja nà, winen nə dō maja'am a Mbərom. Winen apan i tətakan anan mungwalay anà dō si mer su way uno ahay aday tâ ga mədīgweđ, tâ rac sluwed sə pəra asa re.

21 Nə varak anan alay awan aday â yam pə sədœk anahan awan, əna a ngam sə mbəsak ines anahan ahay bay hwiya.

22 «Anga nan, ni zləm̄ba anan pə lala sə mədīgweđ anahan ata awan, aday tinen tu dō anahan a sa ga mədīgweđ ataya ti sa məndolor sə dəcə à alay uno

wa. Kak si tə mbəsakak, tə yimak pə ines a tinen ataya aday bay nà, ni mbəsak atan bay.

²³ Ni pəslay panan gwaslay ahay re, aday egliz ahay fok sənən nà, nen na san way a kwanay sə bayak à mível a kwanay ataya zle. Ni varak ikwen magwagway pi mer su way a kwanay ataya fok.

²⁴ «Əna kwanay, dō azar aya à Tiyatira ite nà, ni jak ikwen: Ni tavakak ikwen awan maza pa nga ite bay, anga kwanay kə ngəmen sa daf nga pə atətak way a tinen a lelibay ataya itəbay. Aday asa, way a tinen sə ngaman wurwer ana Fakalaw mi dər ataya nà, kwanay kə tətiken itəbay re.

²⁵ Way inde kərtek: Bənen anan adaf nga a kwanay ata lele, hus pə luvon uno saa may ahay.

²⁶ «Anà dō sə mbasay pə dāce ataya, aday winen apan i ga mer su way uno hwiya cəna, ni varan məgala sə lavan nga anà kon azar aya awan,

²⁷ kawa ana Bəbay uno sə vuro məgala ata awan. Ni varan anà dōwan ata dukwen sukol sə rəslom sa ga anan bahay, aday â kad anan kon ahay kawa sa kad səngəle sə dudō ngum ngum, sedede ata awan,‡

²⁸ aday ni varan bəmtay à alay inde re.

²⁹ «Natiya, dō aday sləmay inde apan nà, â sləne 'am ana Apasay Cəncan a sa jan anà egliz ahay ata awan.»

3

Derewel anga egliz à Sardis

¹ Dowan ata u jo asa, a wa: «Vinden ayak anà maslay a Mbərom a à egliz à Sardis ata nà, natiya: Nen Yesu nà, nen dōwan a mawuzlawazl ahay inde à alay anahan cuwbe aday a lavan nga anà

‡ 2:27 Ca pə Jabuura 2.9.

apasay ahay cuwbe sa ga mer su way ana Mbərom re ata awan. Na san mer su way anak a zle. Do ahay tinen apan ti ngərak, ta wa: “Kə njadak sifa coy.” Cəkəbay iken adəka nà, ma mac awan.

² «Na tan à nga anà mer su way anak pa 'am a Mbərom nà, ma ndav a wa bay. San pi zek, aday slabak. Gan nga anà mer su way anak mə mbəsak ata lele, bina winen apan i ndav zek coy.

³ Bayak pə way anak mə sləne kwakwa ata aday. Ka taa sləne 'am a Mbərom nà, kəkəma kəlanaw? Həna kəma, kà ga ines adəka sabay, yam pə ines anak, aday daf nga pa 'am a Mbərom à mivəl anak inde. Kak kə sənək pi zek aday sə pədək bay cəna, nen ni zlak ayak apak kawa dō sə akar. Ki san luvon a ata bay.

⁴ «Aya əna, dō ahay inde kərtek kərtek àga iken à Sardis nà, ta gak ruhom pə zana ana tinen ahay itəbay. Tinen adəka nà, ta slak sa pak zana kwedekkwedek aya pi zek, aday mi bar pə kərtek awan.

⁵ «Anà dō sə mbasay pə dəce a anaya nà, ni varan cəved sa pak zana herre ata pi zek, aday dükwen ni mbacay anan sləmay anahan à dərəwel su dō tə sifa aya wa bay. A alay a nen pa 'am ana Bəbay uno tə maslay anahan ahay nà, ni ja way anahan, winen nà, dō uno.

⁶ «Natiya, dō aday sləmay inde apan nà, à sləne 'am ana Apasay Cəncan a sa jan anà egliz ahay ata awan.»

Derewel anga egliz à Filadelfiya

⁷ Dowan ata u jo asa, a wa: «Vinden ayak anà maslay a Mbərom a à egliz à Filadelfiya ata nà, natiya: Nen Yesu nà, nen dō cəncan awan, aday

na gad mungwalay itəbay. Way sə təba məsudoh su doh ana bahay Dawuda nà, à alay uno inde. Nə tacak anan məsudoh nà, do maza saa təba dukwen ibay. Nə təkak anan dukwen, dowan saa tacay anan isabay re.

⁸ «Na san way anak a sa ga ata zle, aday na san zle, məgala anak inde gem ibay. Əna, kə dəfak anan apan anà 'am uno lele, kə dəkak anan iken do uno re. Ca apan, nə təkak anak məsudoh həna, dowan saa tacay anan dukwen ibay.

⁹ Sləne aday, do sa jəka tinen Yahuda ahay, aday cəkəbay ta gad nə mungwalay ataya nà, tinen do ana Fakalaw ahay. Ni bənan atan ahay nga ù vo anak, aday ti san, nə pəlay iken acəkan.

¹⁰ Kə rəzlek anan à nga wa kawa anuno sa jak ata awan. Anga nan kutok, ni gak nga i iken a lele aday kə dazay à dəce ahay inde bay. Bina, dəce inde i dazay pu do ahay bayak awan, i katab anan abayak nga su do sə daliyugo ahay fok.

¹¹ Nen apan ni mak ayak bəse. Ban anan way anak sa njad ata nà, lele, anga aday t̄a sa ngəzar panak wa mərdok sə way uno nen saa varak ata bay.

¹² «Do sə mbasay pə dəce ataya nà, ni təra atan kawa kon sə alay su məsudoh ahay ù doh sə mazlaḅ a Mbərom uno inde, aday kula dowan a i rəzlay atan ahay wa bay. Ni vinde patan sləmay ana Mbərom uno tə sləmay sə wulen su doh ana Mbərom uno. Wulen su doh ata nà, winen Urəsalima wiya awan. Wulen su doh ata i dazay à mburom wa, pə cakay ana Mbərom uno wa. Do ataya dukwen ni vinde patan sləmay uno wiya re.

13 «Natiya, dɔ aday sləmay inde apan nà, â sləne 'am ana Apasay Cəncan a sa jan anà egliz ahay ata awan.»

Derewel anga egliz à Lawdikiya

14 Dowan ata awan u jo asa, a wa: «Vinden ayak anà maslay a Mbərom a à egliz à Lawdikiya ata nà, natiya: Nen Yesu nà, nen dɔwan a tə ngaman Amen ata awan. Nen dɔ dīdek a sa taa dākay anan 'am a Mbərom. Mbərom a ndakay way aya fok nà, a nay pi nen a wa.

15 «Na san way anak sa ga ata zle fok. Kə pəruho azar nə tə mivəl kərtek a bay, aday dūkwen nə slənek sa jəka, kə larak nen bay re asa. Kə tavay à gaga inde ata dūkwen, u zlo à nga bay re.

16 Anga nan, kak kə tavak à gaga inde kətanən acəkan nà, ni vənihey iken à 'am uno wa mbaak.

17 «Iken, ka jan anà nga anak dūkwen, iken zlile awan, awan a kəcak bay, aday ka gan may anà awan sabay. Cəkəbay, ka san bay, bina iken mə langed a həməcekeslkəsle, iken ndəpasasa ma ga mugo awan, iken mətawak awan, iken ti zek kəriya sərdaluwwa, aday iken hurof a re.

18 Anga nan kutok, pak sləmay. Nen apan ni jak həna: Sukom gura mə banay a tə uko awan, à alay uno wa, aday ki njad zlile dīdek a acəkan. Sukom zana herre ata à alay uno a wa, aday ki pak pi zek. Ata waray i gak sabay. Sukom way sə ide pi nen wa, aday ata ki tudē ĩ ide inde, aday ki i canan ide lele kutok.

19 «Nen nə pəlak anan dɔwan a nà, nə gafan 'am pə way ahay aday nə kəta anan re. Matanan, sumor a nà, kə gəsle anan ta 'am uno itəbay, yam pə ines anak ahay adəka!

²⁰ Pak sləmay lele, nen mə tavay a həna pa 'am su doh, ni ngamay uho. Dowan kə slənek 'am uno uho, aday kə təbək uno ayak wa nà, ni zla ù doh àga winen, mi i pa đaf maya awan.

²¹ «Do sə mbasay pə way sə daliyugo ahay nà, ni varan atan cəved sa nay ahay aday mi i njahay tu do ataya pa man sə njahay sə bahay uno. Kawa nen a đukwen, nə mbasak pə way ataya re, həna mə njahak tə Bəbay uno pa man sə njahay sə bahay anahan ata awan.

²² «Natiya, do aday sləmay inde apan nà, à sləne 'am ana Apasay Cəncan a sa jan anà egliz ahay ata awan.»

4

Ahəran nga anà Mbərom à mburom

¹ Pə dəba anahan a wa, na ca idə à mburom, nə canan anà 'am su doh mə təba awan. Nə sləne dundo a dowan a su jo 'am kurre ata, a ndar kawa məzləzlilen ata awan. U jo nà: «Hayak à mburom à man a anan aday ni đakak anan way a sa naa təra ataya awan.»

² A alay ata cəna, Apasay Cəncan a a nay ahay upo. Nə canan anà man sə njahay sə bahay à mburom, dowan a inde winen mə njahay a apan.

³ Dowan ata nà, idə anahan a wuted kawa kon mə rəba aya ata awan, a ca zeziye, aday dəzdaz a re. Awan a kawa kulay a van nga anà man sə njahay anahan ata awan, kulay ata đukwen a dav nə kawa kon ataya re.

⁴ Man sə njahay maza aya inde kwa kuro cew nga anahan a fudó à man ata re. Ta van nga anà man sə njahay sə bahay ata awan. Məced ahay

inde, tinen kwa kuro cew nga fudó mə njahay aya apan. Tinen tə zana aya pi zek nə kwedekkwedek, aday jugo sə bahay ahay inde patan mə ndakay aya sə gura.

⁵ Cœrœd, Mbərom a wuted, tanday a dac apan hohum hohum pa 'am sə man sə njahay sə bahay ata wa. Lalam ahay inde à man ata cuwbe, tinen apan ti dav à man ata lele. Lalam a cuwbe ataya dukwen, tinen nà, apasay ahay cuwbe sa ga mer su way ana Mbərom.

⁶ Awan a inde kawa dəlov sə malam, ide a slar wa nà, ngal ngal kawa malam mə banay awan. Awan ata dukwen pa 'am ana man sə njahay sə bahay ata awan.

Awan aya inde fudó, ta van nga anà man sə njahay ata tew. Awan ataya nà, tinen tə sifa aya awan, aday zek a tinen a dukwen cœrkəzlkazl ide a dəkdek, ta sa 'am aday ta sə dəba a tæke re.

⁷ Awan a mama'am a nà, a ga minje tə ziyel. Way mə slala cew a nə a ga minje ta wan sa sla. Way mə slala maakan a kəma, ide anahan nà, kawa ide su dō. Aday way mə slala fudó kutok nà, winen kawa zləba winen apan i fatay.

⁸ Awan ataya fok aday nà, bərgaslay ahay inde patan nə mbərka mbərka. Zek a tinen aya dukwen cœrkəzlkazl ide a dəkdek, pə day sə bərgaslay ahay fok re. Awan ataya tinen apan ti ga ara mənəna sə mbəsak, luvon tə ipec fok. Ta wa:

«Cəncan a nà, Mbərom a taayak!

Cəncan a nà, Mbərom a taayak!

Iken Mbərom, kə zalay way ahay fok,

iken a pa nga awan.

Iken inde kwa həna kabay,

iken inde həna,
 aday azana pa 'am đukwen, iken a re.»

⁹ Awan fuđo ataya ta ga nà, ara sə zambad anan Mbərom awan. Tə həran nga, tə ngəran anà Mbərom, đowan a mə njahay a pa man sə njahay sə bahay ata awan, anga winen inde tə sifa pa sə viyviya awan.

¹⁰ A alay a tinen apan ti həran nga ata nà, məced ahay kwa kuro cew nga fuđo ataya, tinen apan ti dukwe gərmec pa 'am ana Mbərom mə njahay a pa man sə njahay sə bahay ata awan, aday winen tə sifa đukwen pa sə viyviya awan. Ata ti cəlukwan jugo à nga wa ti đaf anan pə cakay sa man sə njahay sə bahay ata awan, ti həran nga matanan, ta wa:

¹¹ «Bahay a manay Mbərom,
 mazlađ tə məgala inde apak.
 Lele nà, đo ahay t̄ đafak apan, t̄ hərak nga,
 anga sə ndakay way ahay fok nà, iken.
 Kə ndakay atan đukwen,
 anga a zlak à nga,
 aday t̄ ga inde.»

5

Saa t̄ba anan đerewel mə tapay a nà, wan sə t̄man

¹ Aday nə canan anà đerewel a inde à alay puway ana đowan a mə njahay a pa man sə njahay ata awan. Đerewel ata đukwen mə vinde a nà, day cew maya awan. Đerewel ata mə fađay a asa, aday ma ga mətətok a à man ahay cuwbe lele, aday à saa t̄ba bəse bay.

² Natiya awan, nə canan à maslay a Mbərom, aday nə sləne winen apan i ja tə məgalak a, a

wa: «Dowan a saa mba apan sə kwahak anan mətətok a anan aday i pəsak anan dɛrewel a anan nə wayaw?»

³ Əna dɔwan ibay, kwa à wulen su dɔ ma mac aya awan, kwa à man wura, kwa à mburom dɔkwen, dɔwan inde saa mba apan sə kwahak anan mətətok ata, aday saa ca idɛ à dɛrewel ata inde nə, ibay.

⁴ Na ma nga pə ayam cəɔcək cəɔcək, anga dɔwan inde təɔɛ i kwahak anan mətətok aday i ca idɛ à dɛrewel ata inde nə, ibay.

⁵ Məcɛɛ ahay kwa kuro cew nga fudɔ ataya, kərtɛk a tinen a, u jo a wa: «Kâ yam bay. Ca idɛ, dɔwan inde tə ngaman “Ziyel”, winen zahav ana Yahuda, slala ana bahay Dawuda. Winen nə, dɔ sə mbasay pə way ahay fok. I mba apan sə kwahak anan mətətok a cuwɔɛ ataya aday sə təɔa anan dɛrewel ata awan.»

⁶ Cəna, nə canan anà wan sə təman a inde, winen mə tavay a pə cakay sa man sə njahay sə bahay ata awan. Məcɛɛ ahay tatə awan a fudɔ ataya ta van nga tew. Wan sə təman ata nə, winen abay ma vad awan. Winen tə ləkam aya cuwɔɛ pa nga. Idɛ ahay inde cuwɔɛ pa nga anahan re. Idɛ ataya cuwɔɛ nə, tinen apasay a Mbərom ahay cuwɔɛ sa taa slan atan kwa aha pə daliyugo ataya awan.

⁷ Wan sə təman ata a zla à man ana dɔwan a mə njahay a pa man sə njahay sə bahay ata awan, a təma anan dɛrewel ata à alay puway anahan wa.

⁸ A təma anan dɛrewel ata cəna, awan a fudɔ ataya tə məcɛɛ a kwa kuro cew nga fudɔ ataya tə dukwen gərmec ù vo anà wan sə təman ata awan. Tinen tə gənjaval aya fok à alay inde, aday tə tasa sə

gura aya re. Tasa ataya nà, ma rah aya tə ləluway. Ləluway ataya nà, amboh su dō ana Yesu ahay sa taa ga ataya awan.

⁹ Do ataya ta ga ara wiya awan, ta wa:

«Iken ka slak sə təma anan dərəwel,
 ka slak sə kwahak anan mətətək aya re.
 Anga iken a aday nà, tə vədak iken, kə məcak.
 Kə təkək anan dō ahay bayak a tə mez anak ata
 awan.

Kə bəmbadək dō ahay anà Mbərom,
 à wulen sə zahav ahay wa fok,
 à wulen sa 'am ahay wa fok,
 pə slala, pə slala fok,
 aday pu kon, pu kon fok re.

¹⁰ Tə tərək dō anahan ahay à bahay anahan inde,
 aday tinen dō sa gan mer su way anà Mbərom
 ù doh sə mazlaḅ anahan,
 aday ti ga bahay pə daliyugo fok.»

¹¹ Pə dəḅa anahan a wa cəna, nə canan anà maslay ana Mbərom ahay, tinen bayak a ti baslay zek bay. Tinen ma van nga awan, anà man sə njahay sə bahay ata awan, anà awan a fudō ataya pə kərtek a tə məcəd a kwa kuro cew nga fudō ataya awan. Nə sləne tinen apan ti ga ara.

¹² Ta ga ara ata nà, tə məgalak awan, ta wa:

«Wan sə təman a ma vad ata nà,
 kà slak, aday dī həran nga, dī dəfan apan,
 anga məgala anahan inde, zlile anahan inde,
 asan way anahan inde re, gədan anahan a
 dūkwen a ndav bay,
 winen tə mazlaḅ awan.»

¹³ Natiya nə sləne asa, way ahay fok, à mburom, pə daliyugo, à bəlay ahay inde, aday à man su dō ma mac aya, tinen apan ti ga ara, ta wa:

«Həruko anan nga anà dōwan a mə njahay a pa
 man sə njahay sə bahay ata awan,
 aday anà wan sə təman re, dəfuko atan apan.
 Məgala tə mazlaḅ ahay fok ta nay ahay à tinen a
 wa.
 Zambadūko atan pa sə viyviya awan.»

¹⁴ Awan a fudō ataya tə mbəda apan, ta wa:
 «Amen!» Məced ataya ta ma nga sə dukwen gərmec
 ù vo anà wan sə təman tu dō a mə njahay a pa man
 sə njahay sə bahay ata awan, tə həran atan nga.

6

A kwahak anan mətətək ahay

¹ Cəna, nə canan anà wan sə təman, a təma anan
 dərewel a mə tapay a tə mətətək man cuwḅe ata, a
 kwahak anan mətətək a kərtek awan. Ata, nə sləne
 awan a à wulen sə awan a fudō ataya, a ja 'am, a
 ndar kawa Mbərom a dac ike, a wa: «Hayak!»

² Kagsal, pəles kwedəkkwedək a a zləray ahay
 bok. Dəwan a inde pə pəles ata awan, linge inde
 à alay anahan, aday winen a dukwen tə tuwdek
 anan jugo sə bahay à nga inde. Kə mbasak pə dō
 manide ahay, aday kə zlak saa ga vərəm aday i
 mbasay patan asa re.

³ Aday wan sə təman a kwahak anan mətətək mə
 slala cew awan. Cəna, nə sləne awan a mə slala
 cew ata, a wa: «Hayak!»

⁴ Pəles maza awan, a ca dəzdəz, a zləray ahay
 bok. Tə varan anà dōwan a mə njahay a pə pəles
 ata nə, maslalam məduwen awan. Tə varak anan
 cəved sa njak anan dō sə daliyugo ahay pi zek, aday
 tâ ga vərəm, tâ jaf zek ahay, məsinde səngaf səngaf.

⁵ Aday wan sɛ tɛman a kwahak anan mɛtɛtok mɛ slala maakan awan. Cɛna, nɛ slɛne awan a mɛ slala maakan ata, a wa: «Hayak!» Kagasl, pɛles zɛnzen a tɛrew tɛrew a zɛray ahay bok. Agwada sɛ lavay way inde à alay anà dɔwan pɛ pɛles ata awan.

⁶ Nɛ slɛne dungo a kawa su dɔ, a ndɛray ahay à wulen sɛ awan a fudɔ ataya wa, a wa: «May pɛ daliyugo! Dala si mer su way hway cɛna, i sukom nà, ndaw agwada kɛrtektɛkke. Kak ndaw gadam nà, agwada maakan. Əna mbɛsak anan atɛ mahay tɛ amar tɛ ga inde tuwɛa.»

⁷ Aday wan sɛ tɛman a kwahak anan mɛtɛtok mɛ slala fudɔ ata cɛna, nɛ slɛne awan a mɛ slala fudɔ ata a wa: «Hayak!»

⁸ Pɛles a inde kɛfatata. Dɔwan a pɛ pɛles ata, tɛ ngaman Amac, aday Mɛke a pɛrahan azar. Tɛ njadak cɛvɛf pa man sɛ daliyugo ahay fudɔ fok, sɛ gɛba wa day kɛrtek a, aday dɔ ahay tɛ mac ta may, tɛ mɛgara, tɛ vɛram à man ata awan, aday way sɛ kiɛ ahay dukwen tɛ rac atan re.

⁹ Aday wan sɛ tɛman a kwahak anan mɛtɛtok mɛ slala dɛra awan. Nɛ canan anà sifa su dɔ ma vad aya anga tɛ wazay 'am a Mbɛrom, tinen mɛ njahay aya ù vo sa man sɛ varan way anà Mbɛrom ata awan. Ta vad atan anga tɛ tɛmahak 'am a Mbɛrom, aday tɛ dakak anan kawa ana Yesu sa jan atan ata awan.

¹⁰ Dɔ a ataya ta ja tɛ mɛgalak a, ta wa: «Bahay a manay Mbɛrom, iken nɛ mɛduwen awan, iken dɔ cɛncan awan, aday dɔ dɛdɛk awan. Dɔ sɛ daliyugo ahay tɛ vɛdak manay. Ki i gan atan sariya nɛ siwa kɛla anaw?»

11 Kagasl, ta pak patan zana kwedekkwedek aya fok, ta jan atan: «Ben apan mənjoek asa, tâ vad apan mərak a kwanay sa gan mer su way à Mbərom ataya kawa tinen sa vad kwanay ataya re asa aday. Ta sak a vad apan dō ahay aday kə dəzlek kawa ana Mbərom sa gan may ata nà, i i gan atan sariya kutok.»

12 Aday nə canan anà wan sə təman ata, a kwa-hak anan mətətək a mə slala mbərka ata awan. Daliyugo fok a bəl kəzlek kəzlek. Pac dukwen a dav sabay, a ca zənzen kawa kupon. Ata kiya nà, a ca ngəlazaza kawa mez.

13 Pərtətazltazla mawuzlawazl ahay mə guce aya à məndak, kawa wan sə rəve ma nah a bay a, mad sə gucey anan ahay i sé wa ata awan.

14 Mburom fok inde sabay, a faɣay zek kawa sə faɣay biket ata awan. Bəzlom pi zek tə culok ahay à a'am inde ataya, tinen inde à man a tinen ahay inde sabay re.

15 Dō ahay pə daliyugo fok ta ɖer zek. Ta ɖer zek à sləlak sə bəzlom ahay inde, à lar ahay inde. Sa ɖer zek a nà, bahay ahay, wan bahay ahay, bahay sə suje ahay, dō sə zlile ahay, dō məduwen aya sə daliyugo a anaya awan, bile ahay aday dō azar aya fok re.

16 Tə ngaman anà bəzlom ahay, aday ta wa: «Mbəzlen ahay pumo, ɖəren manay pa man sə ide a dowan a mə njahay a pa man sə njahay sə bahay ata wa. Dəren manay pa wan sə təman wa re, anga winen tə mivel a tə manay.

17 Anga mivel a tinen ata kə dəzlek ahay. Waya saa mba apan sə səmen à luvon ata anaw?»

7

Do sə Isəra'ila ahay 144,000

¹ Pə dəʒa anahan a wa, nə canan anà maslay a Mbərom ahay fuđo, tinen mə tavay aya pə bərgaslay a Mbərom ahay fuđo fok ite. Ta gan nga anà mađ sa day ahay fuđo fok lele, anga aday mađ â saa laman anà a'am bay, anà daliyugo bay, aday â saa laman anà dədazl si sé ahay bay re.

² Nə canan anà maslay a Mbərom a hinen inde a may ahay à dəlon wa. Way sa ga vivay a Mbərom bahay sə sifa pə đo ahay, inde à alay anahan. A ngaman tə məgalak a anà maslay ataya fuđo awan, anga Mbərom a varan atan məgala sa nes anan dədala tə a'am nà, anà tinen awan.

³ A jan atan, a wa: «Kê nəsən anan dədala, a'am tə dədazl si sé ahay fan bay. Guko vivay ana Mbərom pi jœer ana đo si mer su way anahan ahay aday.»

⁴⁻⁸ Tu jo abaslay su đo ataya ma ga vivay aya awan, tinen mbulo səkət tə kwa kuro fuđo nga fuđo (144,000), tinen à wulen sə zahav sə Isəra'ila ahay wa kuro nga cew fok. Kawa sa ja nà, pə zahav fok mbulo kuro nga cew. Zahav ataya nà, zahav ana Yahuda, ana Ruben, ana Gada, ana Aser, ana Neftalim, ana Manasa, ana Simiyon, ana Lewi, ana Isakar, ana Jabulon, ana Yusufu aday ana Benyamin.

Man su đo su kon azar aya awan

⁹ Pə dəʒa anahan a wa nà, nə canan anà man su đo, a baslay zek bay. Ta nay ahay kwa à wulen sə zahav ahay wa fok, aday pə slala pə slala, pu kon pu kon, aday 'am ahay fok inde. Tinen a fok mə tavay aya pa 'am ana man sə njahay ana bahay

aday pa 'am ana wan sə təman. Tinen a fok ma pak zana aya pi zek kwedekkwedek aya awan, aday daslam sə təba ahay à alay inde sə həran anan nga anà Mbərom.

¹⁰ Ta ja 'am tə məgalak awan, ta wa:

«Da tam nà, tə alay ana Mbərom a mənuko
winen mə njahay a pa man sə njahay anahan,
aday tə alay ana wan sə təman re.»

¹¹ Maslay a Mbərom ahay fok, tinen mə tavay aya awan, aday ta van nga anà man sə njahay sə bahay, pi zek tə məced ahay pə kərtek a tə awan a tə sifa aya fuɗo ata awan. Tə dukwen gərmec ù vo anà man sə njahay sə bahay, aday tə həran nga anà Mbərom

¹² ta sa ja asa:

«Amen!

Mbərom a mənuko nà,
mazlaɓ inde apan,
məgala anahan inde,
winen kəlire* awan,
gədan inde apan,
inde apan pa sə viyviya awan.

Həruko anan nga,
guko anan suse,
ɗəfuko anan apan,
sə coy awan.

Amen!»

¹³ Dowan a à wulen su ɗo məced ataya kərtek a, a cəce puno wa, a wa: «Həna anan, ma pak zana aya kwedekkwedek a anaya nà, maya ite anaw? Ta nay ahay awanaw?»

* **7:12** Kəlire a anan nà, madan bay, əna asan way ana Apasay a Mbərom.

14 Nə mbəḏahan apan, na wa: «Sa san nə iken awan! Bina nen na san atan bay.»

U jo asa, a wa: «Do anaya nà, ta gak anan ngatay anà way ahay fok, tə səmak anan anà dāce məduwen ata awan. Tə banak anan zana a tinen ahay i mez ana wan sə təman inde, anga aday ā dav herre.

15 Anga nan kutok:

Ta njad sə tavay pac pac pa 'am ana man sə njahay a Mbərom.

Ta gan mer su way à Mbərom ù doh sə mazlaḅ anahan awan.

Mbərom, dōwan a mə njahay a pə man sə njahay ata i i gan atan nga tə mazlaḅ anahan.

16 May tə jom i gan atan kula sabay.

Pac i kwadāh atan sabay,

way saa han patan uko nà, inde sabay.

17 Anga wan sə təman a pə cakay ana man sə njahay sə bahay ata, i gan atan nga,

i lagay atan pə kurok sə a'am sa var sifa ata awan.

Mbərom i təlkaḏan atan anan idē sə ayam a tinen ahay pə idē wa.»

8

Akwahak mətətok a mədakwidok a ata awan

1 Wan sə təman a ma pə dērewel ata awan. A kwahak anan mətətok a mədakwidok a mə slala cuwḅe ata cəna, dōwan kà jak 'am à mburom sabay tətēmtēme, i ga way sə minit kwa kuro maakan.

2 Pə dəḅa a wa nà, nə canan anà maslay a Mbərom ahay cuwḅe sa taa tavay pa 'am ana Mbərom ataya awan, aday tə varak atan məzləzlilen à alay inde fok a tinen a re.

³ Maslay a Mbərom hinen inde kərtek a nay, a tavay pa man sə varan way anà Mbərom ata awan, aday tasa sa vak ləluway ahay à alay inde, tasa ata nà, sə gura. Tə varak anan ləluway ahay bayak a aday i vak anan pə ruwec sə gura ata anga Mbərom, aday ruwec ata dukwen winen pa 'am ana man sə njahay sə bahay. Winen apan i vak anan ləluway ataya cəna, ata a zəga anan amboh su do a Yesu ahay sa ga pə daliyugo ata awan.

⁴ Natiya kutok, jinjek sə ləluway ata, pi zek tə amboh su do a Yesu ataya, a slabak pa 'am a Mbərom, à alay ana maslay a Mbərom ata wa.

⁵ Maslay a Mbərom ata a gəba tasa sə gura ata, a rah anan ta slan sə uko sə ruwec ata awan, a pəkak anan ayak pə daliyugo. Mbərom a wuted, a dac nguzlec, aday a gungwal. Daliyugo a fok a bal kəzlek kəzlek.

Məzləzlilen ma fa aya fudo

⁶ Natiya maslay a Mbərom a cuwəe ataya tə lavay zek sa fa anan məzləzlilen a tinen ahay.

⁷ Aday maslay a Mbərom mama'am ata a fa anan mbala anahan. Lanja, uko, mez, tə japay fok kərtek, aday a pəkay ahay pə daliyugo. Daliyugo ite a gəzla zek maakan, aday day kərtek a, a vak tə dədazl su way aya təke. Gujed ahay fok tə vakak re.

⁸ Natiya, maslay a Mbərom mə slala cew ata a fa anan məzləzlilen anahan ite. Awan a inde məduwen a kawa bəzlom winen apan i ban, ta lar anan à a'am inde təzlev. A'am ata a gəzla zek maakan, aday day kərtek a təra fok kawa mez.

⁹ Way sə a'am ahay fok, kərtek pə maakan a nə kə məcak, aday kwalalan ahay dukwen, tə nəsek matanan re.

¹⁰ Natiya asa, maslay a Mbərom mə slala maakan a ata a fa anan məzləzlilen anahan ite. Mawuzlawazl a inde məduwen a, a slahay à mburom wa. Winen apan i ban kawa miresl sə uko. A slahay cəna, a nes anan zlınder ahay kərtek pə maakan aday tə kurok aya təke.

¹¹ Tə ngaman anà mawuzlawazl ata nà, Məduwek. A'am sə zlınder ahay fok tə gəzla maakan, aday Məduwek ata a təra anan a'am sa day mə slala maakan ata sərekeke. Do ahay bayak a tə məcak anga sa sa a'am a sərekeke ata awan.

¹² Maslay a Mbərom mə slala fudó ata a fa anan məzləzlilen anahan ite. A fa anan cəna, tə dəcan anà way ahay fok à mburom. Pac a gəzla maakan, kiya matana awan, aday mawuzlawazl ahay kərtek pə maakan fok kə mbacak à alay kərtek a wa mbətək, ta dav sabay. Luvon tə ipec a təke a gəzla zek maakan re. Day sə ipec kərtek a pə maakan, day sə luvon kərtek a pə maakan nà, awan kə dəvak uda sabay.

¹³ Kagasl, nə canan anà zləba məduwen a winen apan i fatay à mburom. Nə sləne winen apan i ja tə məgalak awan, a wa: «Wawayah! Wawayah! Dəce pu do sə daliyugo ahay! Anga maslay a Mbərom ahay inde maakan ti fa məzləzlilen a tinen ahay mba. Ta sak a fa atan cəna, dəce ahay ti nay ahay bayak awan.»

9

Məzləzlilen ma fa mə slala dāra awan

¹ Cəna, maslay a Mbərom mə slala dāra ata a fa anan məzləzlilen anahan. Nə canan anà mawu-zlawazl a inde mə slahay à mburom wa, à məndak. Tə varan anan lakile sə təba anan bələlen sə məke sə mərda ata awan.

² A təba anan do'a cəna, jinjek a zləray wa dul dul kawa jinjek sə uko sa tak way. Jinjek ata a kərtan pə ide anà pac kustehtehhe, aday ide zənzen a ga takədimbom.

³ Jaray a zləray à jinjek ata wa pə daliyugo fok. Mbərom kə varak atan məgala sa nda dō ahay kawa rəje.

⁴ Kə varak atan cəved sa gan awan anà daslam ahay bay, tâ saa laman anà gujed bay, aday kwa dədom təkede tē laman bay re. Tā nda nà, dō ma ga vivay ana Mbərom a pi jœr itəbay ataya awan.

⁵ Tə njadak cəved sa mac anan dō ataya bay re, əna ti ga dəcə kiya dāra cəna coy. Dəcə ata dukwen, a han kawa ahan sə rəje sa nda dō aday a gan atan ata awan.

⁶ A kiya dāra ata inde ite nà, dō ahay ti gan may anà amac, aday ti njad bay. Ti pəlay amac pi zek, əna cəved sa mac inde sabay.

⁷ Jaray ataya nà, ta ga minje tə pəles sə vəram ahay. Jugo sə bahay ahay inde patan à nga inde, ma han aya nə tə gura. Nga a tinen aya dukwen kawa nga sə dō ahay.

⁸ Sibœk a tinen aya nə kawa sibœk sə uwar ahay, aday slan a tinen aya kutok nà, kawa slan sə ziyel ahay ite.

⁹ Dəginəginə a tinen ahay ma ban aya kawa tə palalam sə rəslom. Bərgaslay a tinen awan, a ndar nə kawa muta sə pəles ahay bayak a, tinen apan ti haw à man sə vəram ata awan.

¹⁰ Guter patan kawa ana rəje nduwrenren, aday ta nda do nà, tə winen a re. Sə varan atan məgala sa gan way anà do ahay kiya dāra ata dukwen, guter ataya awan.

¹¹ Bahay a tinen a nà, maslay a sa ba pə məke sə mərda ata awan. Tə ngaman ta 'am sə Yahuda ahay nà, Abadon, aday ta 'am sə Gərek ite, Apoliyon. Sləmay ataya a nan sa ja nà: «Do sə lize way.»

¹² Natiya, dāce mama'am a kə ndəvak. Əna dāce maza aya inde cew asa re.

Məzləzlilen ma fa mə slala mbərka awan

¹³ Kutok, maslay a Mbərom mə slala mbərka ata a fa anan məzləzlilen anahan ite. Nə sləne 'am a ndəray ahay kwa à ləkam ahay fudo pə ruwec sə gura ata wa, winen pa 'am a Mbərom ata awan.

¹⁴ 'Am a sə ndəray ahay ata a jan anà maslay a Mbərom a sa fa məzləzlilen a mə slala mbərka ata, a wa: «Pəsak anan maslay a Mbərom aya fudo, ma ban aya pa 'am zlınder sə ngaman Efəratıs ata awan.»

¹⁵ Tə pəsak atan cəna, ta vad do ahay, kərtek pə maakan fok kə məcak. Anga Mbərom a lavay anan zek tə tinen sa ga mer su way ata à alay a anan, pə luvon a anan, pə kiya a anan, aday pə ava a anan re.

¹⁶ Cəna, nə canan anà suje ma ján a pə pəles ataya, tinen bayak awan. Tu jo abaslay a tinen awan, tinen miliyon səkat cew (200,000,000).

¹⁷ I cəen sə zıfay uno ata, nə canan nà, natiya. Pəles ahay tu do a ma ján aya apan, tinen tə zana sə vəram aya pi zek dəzdəz kawa slan sə uko, aday mbamburom kawa a'am sə dəlov ahay, aday kawa

azay sa wan re. Nga sã pãles ataya kawa nga sã ziyel ahay. Jinjek a pi zek tã uko, tatã mætãtok sã uko ta nay à 'am a tinen ahay wa.

¹⁸ Dãce a maakan a sã zlãray à 'am sã pãles ataya wa nã, ta vad dõ kãrtek pã maakan fok.

¹⁹ Natiya awan, mægala ana pãles ataya sa gan way lelibay a anã dõ ahay, a nay nã, à 'am a tinen aya wa. Guter a tinen aya dukwen ta gan way anã dõ ahay re, anga guter aya kawa dãdew ahay, nga ahay inde patan.

²⁰ Dõ aday tã mãcak anan tã dãce ataya itãbay ata nã, ta ngam sã mbãsak sã hãran nga anã setene ahay bay, ta ngam sã mbãsak pãra a tinen a sã ndakay ataya bay re. Tã ndakay pãra a tinen aya nã, tã gura, tã dala, tã ndãfãre, tu kon aday tã dãdom re. Way a mã ndakay ataya nã, tã canan idẽ bay, tã slãne slãmay bay, aday ta zla bay re. Æna a nan atan sã pãrahan azar sã hãran nga hwiya.

²¹ Dõ ataya nã, tã mbãsakak sa ga ines ahay bay, tinen apan ti vad dõ hwiya, tinen apan ti ga madan a tinen ahay, tinen apan ti dah uho, tinen apan ti kãra way ahay hwiya re.

10

Maslay a Mbãrom tã ðerewel cãdew awan, à alay inde

¹ Pã dãba anahan wa, nã canan anã maslay a Mbãrom hinen mægala a re, winen apan i dazay ahay à mburom wa. Zana anahan pi zek nã, matapasl, aday winen mã tuwẽd nga nã tã kulay. Idẽ anahan a dav kawa pac sã ipec. Saray anahan ahay ta ca kawa miresl sã uko.

² Derewel cəfəw a inde à alay anahan, mə təba awan. A ngazlay saray sə alay puway pa nga sə a'am, saray sə alay gula nà, pə yugo uho.

³ A zlah tə məgalak a kawa ziyel sa yam. Cəna, nə sləne Mbərom a dac tanday tanday saray cuwbe sə mbədahan apan.

⁴ Adac a Mbərom a cuwbe ataya a ndav nà, abay u no sə vinde anan way a nen sə sləne ata awan, əna nə sləne dundo a ndəray ahay à mburom wa asa, u jo: «Kê vinde anan 'am ana Mbərom sa dac cuwbe ataya bay, anga aday dowan â san 'am ataya bay.»

⁵ Maslay a Mbərom a mə ngazlay saray a kərtek pa nga sə a'am, kərtek pə yugo ata, a ka alay à mburom,

⁶ a mbaday dərzalah tə sləmay a Mbərom, a wa: «Mbərom winen inde tə sifa pa sə viyyiya awan, winen do sə ndakay atə mburom tə daliyugo tə bəlay. A ndakay mburom tə awan anahan aya təke, daliyugo dukwen tə awan a anahan aya təke, aday bəlay tə awan anahan aya təke ite re. Way a saa təra ata nà, winen apan i təra həna bəse kutok.

⁷ Azanan, maslay a Mbərom mə slala cuwbe ata kà fak anan məzləzlilen anahan nà, Mbərom i ndav anan wa way anahan mi der ata awan, kawa ananahan sa jan panan wa anà do maja'am anahan ahay kwakwa ata awan.»

⁸ Dundo ana dowan nen sə sləne 'am anahan ata u jo ahay à mburom wa, a wa: «Zla, kâ saa təma anan derewel a mə təba ata à alay ana maslay a Mbərom a mə ngazlay saray a pa nga sə a'am aday pə yugo ata wa.»

⁹ Natiya na zla à man ana maslay a Mbərom ata awan, na jan: «Vuro anan dɛrewel a cəfəw a anan.»

U jo nà: «Təma anan, rac anan. I gumak à 'am inde nà, kawa umam, əna ka sak a səɖak anan cəna, i gak sərekeke.»

¹⁰ Nə təma anan dɛrewel ata à alay anahan wa, na rac anan. A 'am inde nà, u gom kawa umam acəkan wanahan. Nə səɖak anan gədek cəna, u go sərekeke.

¹¹ Asa tu jo nà: «Zla, kâ sa ma anan 'am a Mbərom sa ja pə zahav ahay, pu kon ahay, pə slala sa 'am ahay, pə bahay su kon ataya asa.»

11

Do sə ɖakay anan 'am a Mbərom ahay cew

¹ Natiya, tə vuro gusuko à alay inde kawa sukol sə lavay way. Tu jo nà: «Slabak, zla, kâ saa lavay anan doh sə mazlaɓ a Mbərom, lavay anan man sə varan way anà Mbərom, baslay anan do ahay aday tinen apan ti həran nga anà Mbərom ataya awan.

² Əna kâ saa lavay anan gala sə uho ata itəbay, anga Mbərom a kə varak anan anan man ata anà do a azar aya mbala anahan ahay bay ataya awan. Do ataya ti i ngərasl anan wulen su doh à kiya kwa kuro fuɖo nga anahan a cew inde, kawa sa ja nà, luvon mbulo tə səkat cew tə kwa kuro mbərka (1 260).

³ A alay ata nà, ni i slənak ayak do sə ɖakay anan 'am uno ahay cew. Ti man anan 'am uno anà do ahay à luvon a mbulo tə səkat cew tə kwa kuro mbərka (1 260) ataya inde, ti pak pi zek ɖukwen zana sa zla à məsinde.»

⁴ Do ataya cew a nà, mə tavay aya pa 'am ana Mbərom, winen Bahay a pə daliyugo ata awan. Do ataya nà, tinen dədazl si sé ahay cew sə ngaman *ulivet* ataya awan.* Aday tinen lalam ahay cew re.

⁵ Dowan kə pəlak sa gan atan awan a cəna, uko a nay ahay à 'am a tinen wa, a vad anan dowan ata awan. Natiya, do sa gan may sa nan atan ide ahay, ti mac nà, matana awan.

⁶ A alay a tinen apan ti ma 'am a Mbərom ata nà, məgala a tinen inde sə gafan 'am anà iven, aday à ga bay. Məgala a tinen inde sə təra anan a'am mez a re. Aday məgala a tinen inde sa pak məgara pu do sə daliyugo ahay cara cara, kawa sa zlan atan à nga ata awan.

⁷ Ta sak a ndav anan ama 'am a tinen ata nà, zizœk a inde, i nay ahay à məke sə mərda wa re. Zizœk ata i vad zek tu do a cew ataya awan. I mbasay patan, i nja atan, ti mac.

⁸ Məsinde a tinen aya ti njahay hwiya pə cəved sə wulen su doh a məduwen ata awan. Tə ngaman à wulen su doh ata nà, Sodoma, kabay Misra, kawa sa ja bine maw nà, ta ga ines ataya kərtek awan. Tə daray anan bahay a tinen pə dədom mə zləngad a nà, à man ata re.

⁹ Do ahay ti nay sa ca pə məsinde ataya nà, à wulen sə zahav ahay wa fok, à wulen sə slala ahay wa fok, à wulen sa 'am ahay wa fok, aday pu kon ahay wa fok re. Anga nan, tə varak anan cəved anà dowan sa la atan bay luvon maakan tə njamde ahay apan kuro nga anahan cew.

¹⁰ Do sə daliyugo ahay fok ti taslay mivel anga amac su do a cew ataya awan. Ti ga azar uko sa vad

* 11:4 Ca pə deftere Jekariya 4.1-14.

dô ataya awan, ti varan magwagway î zek ahay, anga dô a Mbêrom ataya cew a nà, tê pèkak mægara pu dô sê daliyugo ahay, à alay a tinen apan ti ma anan 'am ana Mbêrom ata awan.

¹¹ Natiya awan, luvon a maakan ataya tê ler aya kuro nga anahan cew ataya ta ndav cœna, Mbêrom a vêzle patan apasay sê sifa anahan, tê slabak way a tinen, tinen tê sifa aya awan. Man su dô a sa zlak ayak sa cay ahay patan ataya, ta ma nga pè ajêjar anga zlawan.

¹² Dô a cew ataya tê slœne dungo a jan atan ahay 'am tê mægalak a kwa à mburom wa, a wa: «Jœnen ahay à man a anan!» Ta jân way a tinen deceb à mburom à matapasl inde pè ide su dô a sa nan atan ide ataya fok.

¹³ A alay ata cœna, daliyugo a bal kœzlek kœzlek. A wulen su doh ata fok, pu doh ahay kuro nà, kêrtek a kè mbœzlek. Anga nan re, dô ahay mbulo cuwbe (7,000) fok tê mœcak. Dô a mœ mbœsak a tê mœcak itêbay ataya dukwen, tê jêjêarak bayak awan. Aday tê hœran nga anà Mbêrom sê bagêbaga mburom.

¹⁴ Natiya kutok, dœce mœ slala cew ata kè ndœvak coy, hinen mœ slala maakan a, winen apan i nay bœse coy re.

Masley a Mbêrom a fa anan mœzlœzlilen mœ slala cuwbe awan

¹⁵ Pœ dœba anahan a wa cœna, masley a Mbêrom mœ slala cuwbe awan, a fa anan mœzlœzlilen anahan ite. Nœ slœne dungo ahay mœduwen aya tê gungwal à mburom, aday ta wa:
«Hœna Bahay a mœnuko Mbêrom tê Almasihu anahan,
ti ga bahay pœ daliyugo kutok.

Mbêrom i ga bahay kêtanan hwiya pa sê viyviya awan.»

¹⁶ 'Am ataya ta ndav cœna, mæced ahay kwa kuro cew nga anahan a fudô, mæ njahay aya pa 'am ana Mbêrom ataya, tæ dukwen gærmec ù vo, tæ hêran nga.

¹⁷ Ta wa:

«Bahay a manay Mbêrom, Ba Mægala,
iken inde nè kwakwa,
hœna dukwen iken a re.

Mæ ngêrak, anga iken apan ki ga bahay pæ daliyugo aday ki lavan nga tæ mægala anak awan.

¹⁸ Ba dô su kon ahay ta gak mivel,
œna alay a ma var a hœna, iken ki ga patan mivel ite,
ki gan sariya anà dô ma mac aya fok.
Alay a ki varan magwagway anà dô maja'am anak ahay, anga tinen bile anak ahay ata nà, kà dæzlek.

Ki varan magwagway anà dô anak ahay,
anà dô sê dæfak apan ataya fok,
kwa gwaslay ahay,
kwa dô mæced aya awan.

œna dô sa nes anan daliyugo ahay ite nà,
ki lize atan wa kutok.»

¹⁹ Pæ dœba sa 'am a tinen ata wa cœna, mæsudoh su doh sê mazlab a Mbêrom à mburom ata a tœba pangaya. Zændok sê aban 'am a Mbêrom ata uda a cay ike. Cœrœd, Mbêrom a wuted, tanday a dac apan hohum hohum, daliyugo a bal, aday lanja a pækay ahay sœngef sœngef bayak awan.

12

Ata uwar tæ zizæk a inde

¹ Cəna, nə canan anà awan a à mburom, a ga masuwayan. Nə canan anà dō uwar awan, zana anahan pi zek nà, pac. A daf saray anahan ite nà, pə kiya. Mazangalan anahan dukwen, sə mawuzlawazl ahay kuro nga anahan a cew, winen kawa jugo sə bahay.

² Uwar ata nà, wan à kutov. Winen apan i wahay bəse coy, kà dəlak anan tə mindel, a han apan. Anga nan, a zlah pi zek tə məgalak awan.

³ Nə canan anà awan a inde à mburom asa. Zizœk a inde, winen kawa gədam məduwen awan, a ca dəzdaz. Nga ahay inde apan nə cuwbe, aday jugo sə bahay ahay pa nga cuwbe ataya re, ləkam ahay kuro inde anan pa nga.

⁴ A məne anan mawuzlawazl ahay à mburom wa à məndak tə guter anahan. Kərtek pə maakan fok kə gucek ahay à mburom wa. Winen a aday nà, a tavay pa 'am ana uwar a winen apan i wahay ata, aday kà sak a wahay a cəna, i gəba anan wan a mə wahay ata awan, aday i rac anan.

⁵ Natiya, uwar ata a wahay anan wan anahan a nà, mungol awan, aday i i təra bahay tə məgala awan pa nga su kon ahay fok. A wahay anan cəna, tə gəba anan, ta haw anan pa 'am ana Mbərom winen mə njahay a pa man sə njahay sə bahay anahan ata awan.

⁶ Zek ana uwar a kutok nà, a haw, a man à nga à man sa saf inde, à man ana Mbərom a sə lavan anan zek aday tã gan uda nga ata awan. I i njahay à man ata nà, luvon mbulo tə səkat cew tə kwa kuro mbərka (1 260).

⁷ Kagasl, vəram a slabak à mburom. Maslay a Mbərom inde tə ngaman Mikayel, a ra maslay

anahan ahay fok, ta vad zek tə zizœk ata aday tə maslay anahan ahay cite re.

⁸ Əna Mikayel tu do anahan ahay tə mbasay patan, tə rəzlak atan. Anga nan, man sə njahay a zizœk ata tə maslay anahan ahay nə inde à mburom sabay.

⁹ Natiya, ta lar anan zizœk a məduwen ata uho. Zizœk ata nà, winen nə, dədew kwakwa awan sa taa njəkan uda anà do ahay kwakwa pə daliyugo fok ata awan. Tə ngaman bahay sə apasay lelibay aya awan. Sləmay anahan dukwen Fakalaw. Tə larak anan à məndak, winen tə maslay anahan ahay fok.

¹⁰ Cəna, nə sləne 'am a ndəray ahay kwa à mburom wa, a wa:

«Həna nà, Mbərom kə təmak nuko kutok.

Kà kak anan məgala anahan.

Winen bahay awan.

Həna dukwen, Almasihu anahan kà kak anan mazałab anahan.

Anga həna,

do wan a sa taa ra 'am pə mərak a mənuko ahay pə cakay ana Mbərom luvon tə ipec ata nà, tə larak anan ayak à məndak.

¹¹ Əna mərak a mənuko ahay tə mbasay apan nə, anga mez ana wan sə təman.

Tə mbasay apan dukwen,

anga 'am a tinen sə cakay anan didək ata awan.

Tə təmahak sa mac, ta mak anan wa bay.

¹² Kwanay a həna à mburom ata awan, tislen mivel kutok.

Atə dədala tə a'am kəma,

dœce anga kwanay kutok wuna!

Anga Fakalaw kə dazak ayak àga kwanay,
 aday dʊkwen winen tə mivɛl awan,
 anga a san zle, a mbəsakan alay a bayak a
 sabay.»

¹³ Zizœk ata a ca apan tə larak anan pə daliyugo
 kəma, a ma nga sə kukwaran azar anà uwar a sə
 wahay wan mungol ata awan.

¹⁴ Əna, uwar ata nà, tə varan bərgaslay sə zləba
 məduwen awan, aday â fatay way anahan à man
 sa saf à man a Mbərom sə lavan anan zek aday tâ
 gan uda nga ata awan. I i njahay à man ata nà, ava
 maakan tə rita.* Zizœk a kawa dədew ata i mba
 apan sə dəzle apan alay à man ata sabay.

¹⁵ Anga nan, dədew ata a vənihey a'am à 'am wa
 kawa zəlaka, aday a'am â hawan azar anà uwar
 ata, â ra anan.

¹⁶ Aka aday maw? Dədala kà mak anan zek anà
 uwar ata awan. Dədala a ta cəđak, a sa anan a'am
 a sa nay ahay à 'am anà zizœk wa ata fok.

¹⁷ Zizœk ata a canan à dədala sa san anan a'am
 ata nà, a zəga anan mivɛl anahan sa ga pə uwar
 ata asa. Anga nan, a ma pə dəba saa ga vəram tə
 gwaslay sə slala anahan a mə mbəsak ataya awan.
 Tinen kəma, dō sə dəfan apan anà 'am a Mbərom
 ahay, aday sə təma sə đakay anan ləbara sa 'am a
 Yesu ataya awan.

¹⁸ Natiya, zizœk ata a zla way anahan saa tavay
 pa 'am məgʊjəgʊjə sə bəlay.

* **12:14** Ava maakan tə rita: kawa sa ja nə luvon 1 260 ata re.

13

Zizœk a inde a zləray ahay à bəlay wa

¹ Cəna, nə canan anà zizœk a inde, a zləray ahay à bəlay wa laɖaɖa. Nga ahay inde apan nə cuwɓe, aday ləkam ahay kuro. Jugo sə bahay ɖukwen pə ləkam pə ləkam. Sləmay lelibay a inde mə vinde pa nga pa nga, sə gənahan anà Mbərom.

² Zizœk ata nà, kawa lungo. Saray anahan aya ɖukwen kawa saray sə dərlinge. 'Am a ɖukwen kawa 'am sə ziyel. Zizœk a kawa gədam ata a mbəsakan anan nə gədan anahan, bahay anahan awan, aday məgala anahan məduwen awan.

³ Nga anahan a kərtek a nà, a ga nə kawa vivay sə mbəlak məduwen a inde apan, abay i mac anan, əna mbəlak ata kə pasak. Anga nan, vivay anahan ata a gan masuwayan anà ɖo sə daliyugo ahay, tə dazlan sə pərahan azar.

⁴ Fok a tinen aya tə həran nga anà zizœk a kawa gədam ata awan, anga kə varak anan məgala anahan anà zizœk sa nay à bəlay wa ata awan. Tinen apan ti həran nga anà zizœk ata kurkwer re, ta wa: «Wayə məduwen a kawa zizœk a anan anaw? Wayə saa mba apan sa ga vəram tə winen anaw?»

⁵ Zizœk ata kə njadək cəved mənjoek sə həran nga anà zek, aday sə gənahan anà Mbərom. Kə njadək cəved sa ga bahay kiya kwa kuro fuɖo nga anahan a cew (42) re.*

⁶ A dazlan sə gənahan anà Mbərom: a gənahan anà sləmay anahan, anà man sə njahay anahan a re, aday anà ɖo mə njahay aya à mburom ata fok.

* **13:5** Kiya kwa kuro fuɖo nga anahan a cew: kawa luvon 1 260 re.

⁷ Kê njadâk cêved sa ga vëram tu dô a Yesu ahay, aday â mbasay patan. Matanan, kê njadâk mægala sê lavan nga anà slala ahay fok, anà zahav ahay fok, anà 'am ahay fok, aday anà kon ahay fok re.

⁸ Do sê daliyugo ahay fok ti dukwen gërmec ù vo. Əna dô aday slëmay anahan inde mæ vinde à dërewel su dô tê sifa aya inde nà, i dukwen gërmec ù vo itəbay. Mbərom a vinde dërewel ata nà, a ban pə ananahan sê ndakay daliyugo wa, aday a varan anan à alay inde anà wan sê təman a ma vad ata awan.

⁹ Natiya, dô aday slëmay inde apan cəna, â sləne 'am a anan:

¹⁰ Dowan a nà, Mbərom a ja nà, sa ban anan, ti ban anan. Dowan a nà, Mbərom a ja nà, sê wacay anan tə maslalam dukwen, ti wacay anan tə maslalam acəkan. Anga nan kutok, lele nə dô a Yesu ahay tê zəga anan sa daf nga pə Mbərom, aday tê səmen anà way ahay.

Zizœk a inde, a zləray ahay à yugo wa

¹¹ Pə dəba wa, nə canan anà zizœk a inde maza asa, winen apan i zləray ahay à yugo wa. Ləkam ahay inde anan pa nga cew, kawa ləkam sa wan sê təman, aday a ja 'am kawa ana gədam re.

¹² A ga bahay anahan a dukwen tə mægala ana zizœk a sa nay à bəlay wa ata awan, a ga nə pa 'am anahan awan. A daf bəlaray pu dô sê daliyugo ahay fok sê həran nga anà zizœk ata awan, winen tə vivay sê mbəlak məduwen a aday mə pasay a coy ata awan.

¹³ Kà gak way ahay bayak a, ma ga masuwayan aya awan: a dazay anan ahay uko à mburom wa pə ide sê dô ahay fok à məndak.

¹⁴ Kə njadək cəved sa ga masuwayan ahay bayak a pa 'am ana zizœk a sə zləray à bəlay wa ata awan. Natiya, masuwayan ataya đukwen tə njəkak anan do ahay bayak a re. Zizœk sə zləray à yugo wa ata a jan atan nà: «Ndiken pəra sa ga minje tə zizœk a mə wacay a tə maslalam, aday kə məcak anan tə mbəlak anahan a bay ata awan.»

¹⁵ Zizœk a sa ja 'am ata nà, kə njadək cəved sə vəzle apasay à pəra ata inde, aday á ja 'am, á mba apan sa var cəved sa vad anan do sə həran nga bay ataya awan.

¹⁶ Zizœk ata a gan bəlaray anà do ahay fok, gwaslay ahay tə məced sə do ahay, do sə zlile aya pi zek tu do mətawak aya awan, bəle ahay pi zek tu do azar aya awan, t̄ t̄ma vivay pə alay puway a tinen ahay, kabay pi jœr a tinen ahay re.

¹⁷ Dowan a aday vivay anahan inde apan ibay nà, i njad sə sukom way à lumo wa bay, i njad sə sukom anan way tə way anahan ahay itəbay re. Vivay ata đukwen nà, sləmay ana zizœk ata awan, kawa sa ja nà, lamba sə sləmay anahan.

¹⁸ Natiya, lele nà, do sə kəlire ahay t̄ san way. Do sə kəlire ahay t̄ san nà, lamba ata a đakay anan nə maw re. Anga lamba ata nà, lamba sə sləmay su do zəzen awan. Lamba anahan nà, səkat mbərka tə kwa kuro mbərka nga anahan a mbərka (666).

14

Do ana Yesu ahay tinen apan ti ga ara wiya awan

¹ Na ca idə asa cəna, nə canan anà wan sə təman mə tavay a à bəzłom sə ngaman Siyona ata awan, tinen tu do a aday sləmay a wan sə təman tə sləmay ana Bəbay anahan mə vinde aya pi jœr a tinen

ataya awan. Tinen a fok nà, tinen mbulo sɛkat tɛ kwa kuro fudɔ nga fudɔ (144,000).

² Nɛ slɛne asa bine maw nà, agungol inde a ndɛray à mburom wa kawa zɛlaka sɛ dazay pɛ pɛkɛrad à zɛlinder ata awan, a ndar kawa adac a Mbɛrom, aday a ndar kawa dɔ ahay tinen apan ti fa gɛnjalaval re.

³ Man su dɔ ataya dukwen tinen mɛ tavay a pa 'am sa man sɛ njahay sɛ bahay, aday pa 'am ana awan a fudɔ ataya awan, aday pa 'am ana mɛced ahay re. Tinen apan ti ga ara wiya awan. Dowan a mba apan sɛ tɛtak ara a tinen ata bay, si kak dɔ a mbulo sɛkat tɛ kwa kuro fudɔ nga fudɔ (144,000) a mɛ bɛmbadɛy aya pɛ daliyugo wa ataya aday.

⁴ Dɔ a anaya nà, ta gak anan nga i zek lele. Tɛ dabolok zek tɛ uwar ahay itɛbay. Tɛ pɛrahan azar anà wan sɛ tɛman nɛ kwa aha. Mbɛrom a tɛmay atan ahay à wulen su dɔ sɛ daliyugo ahay wa anga winen, aday anga wan sɛ tɛman re.

⁵ Mungwalay inde à 'am a tinen itɛbay, ines a tinen dukwen ibay.

Maslay a Mbɛrom ahay maakan

⁶ Natiya awan asa, nɛ canan anà maslay a Mbɛrom maza awan, winen apan i fatay pa nga mburom. A dɛkay anan lɛbara mugom a a mbɛda itɛbay pa sɛ viyviya ata awan. I dɛkan anan anà dɔ sɛ daliyugo ahay fok, anà dɔ sɛ zahav ahay a fok, anà dɔ sa ja 'am wura wura fok, aday pɛ slala pɛ slala, pu kon pu kon re.

⁷ Maslay ata a ja 'am tɛ mɛgalak awan, a wa: «Jɛjiren anan anà Mbɛrom, hɛren anan nga, anga alay a kà slak hɛna i gan sariya anà dɔ ahay.

Hɛren anan nga. Sɛ ndakay bagɛbaga mburom, tɛ daliyugo, tɛ bɛlay, tɛ kurok ahay nà, winen a re.»

⁸ Maslay a Mbɛrom hinen a slɛray ahay asa, a wa: «Coy! Babila, wulen su doh a mɛduwen ata kɛ slahak. Babila kɛ slahak dezdezez! Winen a aday nà, kà hak anan mahay sɛ atahasl anahan anà dɔ ahay. Atahasl anahan ata nà, kɛ wadadək anan pɛ dɔ sɛ daliyugo ahay fok, aday tã ga kawa winen awan.»

⁹ Maslay a Mbɛrom mɛ slala maakan awan, a slɛray ahay asa. Winen ite a ja tɛ mɛgalak awan, a wa: «Kuwaya, dɔwan a kɛ dukwek anan gɛrmec ù vo anà zizɛk ata awan, kabay anà pɛra sa ga minje tɛ winen ata awan, aday kɛ tɛmahak vivay anahan pi jɛer kabay pɛ alay re ata kɛma,

¹⁰ i ga dɛce. I gurac mahay à gɛvet sa ga mivel a Mbɛrom wa, aday mahay ata nà, mɛ japay a tɛ a'am itɛbay. Natiya dɔwan ata i sa dɛce ù uko à dɛlov sɛ uko inde mɛ japay a pi zek tɛ mɛtɛtok sɛ uko ata awan. Dɛce ata i tɛra dukwen nà, pa 'am ana maslay a Mbɛrom cɛncan aya awan, aday pa 'am ana wan sɛ tɛman re.

¹¹ Jinjek sɛ uko sa man sɛ dɛce a tinen ata i slabak pa nga mburom nɛ dadekwdukwe pa sɛ viyviya awan. Kuwaya dɔwan a kɛ dukwek anan gɛrmec ù vo anà zizɛk aday anà pɛra sa ga minje tɛ winen ata cɛna, kɛ tɛmahak vivay sɛ slɛmay anahan, i man uda kula itɛbay, luvon tɛ ipec fok.»

¹² Anga nan kutok, kwanay dɔ ana Yesu ahay, dɔ sɛ dɛfan apan anà 'am a Mbɛrom ahay, dɔ sa daf nga pɛ Yesu ahay, tiven nɛ lele.

¹³ Asa, nɛ slɛne dundo a jay ahay 'am kwa ahay à mburom wa, a wa: «Vinde! I ban pɛ hɛna anan

wa nà, Mbərom i daf alay sə bahay anahan pu dɔ sa mac aday, winen apan i ga mer su way anahan hwiya ata awan.»

Apasay Cəncan a a mbəda apan, a wa: «Matanan acəkan. Ti man uda tə ataslay mivel awan, anga Mbərom a san pi mer su way a tinen ma ga lele ataya zle.»

Sariya a dazlan

¹⁴ Na ca ide asa, nə canan anà matapasl kwedekkwedek awan. Awan a inde mə njahay a apan, a ga minje tə wan su dɔ. Jugo sə bahay inde à nga anahan, ma han a tə gura. Winen ti dem ma pa a hepepe à alay inde.

¹⁵ Maslay a Mbərom maza awan, a nay ahay ù doh sə mazlaɓ a Mbərom wa, a jan anà dɔwan mə njahay a à matapasl inde ata tə məgalak awan, a wa: «Gəba dem anak, car, anga alay sə halan nga anà way ahay kà slak. Daliyugo fok ma nah a təde sa car.»

¹⁶ Natiya, dɔwan a mə njahay a à matapasl inde ata a gəba dem anahan, a car anan way sə daliyugo ahay fok kərap.

¹⁷ Nə canan anà maslay a Mbərom hinen a nay ahay ù doh sə mazlaɓ a Mbərom à bagəbaga mburom wa, winen dukwen ti dem anahan a ma pa a à alay inde re.

¹⁸ Maslay a Mbərom hinen inde maza awan, a nay ahay à man sə varan way a Mbərom ata wa. Winen nà, maslay a Mbərom sə lavan nga anà uko ata awan. A təba 'am, a jan ahay anà maslay a Mbərom a ti dem a ma pa a à alay inde ata, a wa: «Gəba dem anak, aday zlav anan cune mə wahay

aya pə daliyugo ata fok. Anga wan si sé ataya tə nahak coy.»

¹⁹ Maslay a Mbərom ti dem a à alay inde ata, a zlav anan cune mə wahay aya pə daliyugo wa, a pak anan à kudom sə caslay anan wan sə cune ahay. Kudom ata dukwen, man sa ga mivél a Mbərom.

²⁰ Wan sə cune ahay fok, mə caslay aya à kudom inde uho, à wulen su doh wa zad. Zəlaka sə mez a pəkay ahay à kudom ata wa, a haw. Zəbor sə zlınder sə mez ata i ga kilomiter səkat maakan (300). Sədek anahan a dukwen i ga miter cew, pələs à tavay uda nà, saa cay ahay wa nə nga dəkdek.

15

Maslay a Mbərom ahay tə pəkay ahay məgara ahay cuwbe

¹ Pə dəba anahan a wa nà, nə canan anà awan a inde məduwen awan, aday ma ga masuwayan aya à mburom asa. Maslay a Mbərom ahay inde cuwbe, tə məgara aya à alay inde cuwbe ite re. Awan ataya dukwen, məgara mədakwidok aya awan, anga tə məgara ana Mbərom ata dukwen, mivél anahan i ndav sə coy.

² Aday nə canan anà awan a inde kawa dəlov sə malam mə japay a tə uko awan. Asa, nə canan anà dō sə mbasay pə zizæk tə pəra anahan ataya awan, aday tə lamba sə sləmay anahan. Tinen nà, Mbərom kə varak atan gənjaval ahay à alay inde, aday tinen mə tavay aya pa 'am sə dəlov sə malam ata awan.

³Tinen apan ti ga ara ana Musa, do si mer su way ana Mbərom, tə ara ana wan sə təman. Ara ata nə, natiya:

«Mbərom Ba Məgala,
mer su way anak ahay fok nə məduwen aya
awan,
ta ga masuwayan.

Bahay su kon ahay fok nə, iken awan.

Way anak ahay sa ga dukwen,
lele aday didek aya re.

⁴Bahay a manay,
dowan a saa jəjarak bay nə, wayaw?

Dowan a saa ngam sə hərak nga bay nə, winen
wayaw?

Anga iken a kərtek cəncan awan.

Do su kon ahay fok ti nay adəka nə sə hərak nga,
anga do ahay fok tə canak anan anə mer su
way anak ahay fok nə lele.»

⁵Pə dəba anahan a wa asa, nə canan anə doh
sə mazlaḡ a Mbərom ə bagəbaga mburom inde,
kawa sa ja nə, jawjawa cəncan awan, winen mə
təba awan.

⁶Masley a Mbərom cuwbe ataya tə məgara aya
cuwbe ə alay inde, tə zləray ə man a cəncan ata wa.
Tinen ma pak zana kwedekkwedek aya pi zek re,
aday tinen ma ban mbac aya tə maslərapa sə gura.

⁷Kərtek ə wulen sə awan aya fudo tə sifa ataya
inde, a varan tasa sə gura ahay cuwbe anə maslay
a Mbərom a cuwbe ataya cite. Tasa ataya ma rah
aya tə mivel a Mbərom sa ga pə do ahay, aday
Mbərom nə inde tə sifa pa sə viyviya awan.

⁸ Natiya, doh sə mazlaḅ a Mbərom a rah tə jinjek sə mazlaḅ a anahan tə gədan anahan a təke dadek-wdukwe. Dowan sa mba apan sa zla ù doh ata ibay, hus azanan maslay a Mbərom a cuwḅe ataya tə ndəvak anan məgara a tinen a cuwḅe ataya aday.

16

Tasa sə məgara ahay cuwḅe

¹ Nə sləne dundo a məduwen a a ndəray ahay kwa ù doh sə mazlaḅ a Mbərom wa. Winen apan i jan anà maslay a Mbərom a cuwḅe ataya, a wa: «Zlen, kâ sa pəken anan way sə tasa sə mivel a Mbərom a cuwḅe ataya pə daliyugo kutok.»

² Natiya maslay a Mbərom a mama'am awan, a zla, a pak anan way sə tasa anahan pə daliyugo. Mbəlak lelibay aya aday ma han aya a gan anà dō ahay. Sa njad mbəlak ata nà, dō sa njad vivay ana zizœk ataya awan, aday ta taa dukwen gərmec ù vo anà pəra ana zizœk ata re.

³ Asa maslay a Mbərom mə slala cew awan, a pak anan way sə tasa anahan pa nga sə bəlay. A'am sə bəlay ata a təra kawa məngədazay su dō ma mac awan, aday way sə a'am ahay fok tə məcak.

⁴ Maslay a Mbərom mə slala maakan awan, a pak anan way sə tasa anahan pa nga sə a'am sə dəlov ahay aday pa nga sə a'am sə kurok ahay fok. Natiya kutok a'am ahay fok tə təra mez asa re.

⁵ Aday nə sləne maslay a Mbərom a, sa gan nga anà a'am ata a həran nga anà Mbərom, a wa: «Iken nà, dō cəncan awan. Iken inde nà, kwa həna kabay, həna dukwen iken a re. Ka gak anan sariya anà dō ahay həna tə cəved awan.

⁶ Do anaya tē vēfak anan dō anak ahay, aday tē vēfak anan dō maja'am anak ahay re. Anga nan, ka han atan mez, tē njadak magwagway pē lelibay a tinen kutok.»

⁷ Cēna nē slēne dūngo a ndēray ahay à man sē varan way anà Mbērom ata wa. A wa: «Ayaw, Bahay Mbērom, Ba Mēgala, ka ga sariya anak nē tē cēved awan, tē dīdek a re.»

⁸ Natiya kutok, maslay a Mbērom mē slala fudō awan, a pak anan way sē tasa anahan pē idē sa pac. Cēna pac a njad cēved sa dav ndayaya aday sa han sē zalay sē kukwa ata awan, a vak anan dō ahay tē uko anahan awan.

⁹ Anga pac a sa vak atan ata awan, dō ahay ta ma nga adēka nē sē gēnahan anà slēmay a Mbērom, winen dō sē lavan nga anà mēgara ataya awan. Bina, tē ngēmak sē mbēsak anan cēved a tinen a lelibay ataya bay, aday tē ngēmak sē hēran nga anà Mbērom anga mazlaḅ anahan bay re.

¹⁰ Maslay a Mbērom mē slala dāra awan, a pak anan way sē tasa anahan pa man sē njahay ana zizœk ata awan, aday luvon a ga takēdīmbom pē bahay anahan ata fōk. Dō ahay ta ma nga sa rac slan, anga dēce inde ndēlekeke bayak awan.

¹¹ Tē gēnahan anà Mbērom sē bagēbaga mburom, anga dēce tē mbēlak a tinen ataya awan. Aya ēna, tē mbēsakak sa ga huwan bay hwiya.

¹² Natiya asa re, maslay a Mbērom mē slala mbērka awan, a pak anan way sē tasa anahan ite. Winen nā, a pak anan mbala anahan nē à zlinder a inde mēduwen a tē ngaman Efēratis. Coy a'am a sa wa, aday bahay sē dēlon ahay ta njad cēved sē takas anan zlinder ata awan.

13 Cəna nə canan anà apasay lelibay aya maakan. Tinen kawa njəlaadaw ahay, tə zləray à 'am ana zizœk a kawa gədam ata wa, à 'am ana zizœk a sa nay à bəlay wa ata wa, aday à 'am ana dō maja'am a Fakalaw ata wa re.

14 Tinen nà, apasay sə setene ahay sa ga masuwayan ahay cara cara. Apasay ataya ti halan nga anà bahay sə daliyugo ahay fok, anga aday ti ga vəram pə luvon a məduwen a ana Mbərom Ba Məgala ata awan.

15 Bahay a wa: «Ihe, nen apan ni zlak ayak nə kawa dō sə akar, dōwan i san apan bay. Ni daf alay sə mazlaḅ uno pə dō sə dəfan ide anà luvon ata mənʒəna sa njak ahan ata awan, aday dukwen zana anahan inde mə lavay zek a lele, anga aday na sak a zlak ayak cəna, waray i gan sa bar pa 'am sə dō ahay bay, bina zana i ga inde pi zek.»

16 Natiya kutok, apasay a lelibay ataya, tə halan nga anà bahay ahay fok à man kərtek awan. Tə ngaman anà man ata ta 'am sə Yahuda ahay nà, Harmagedon.

17 Kagasl, maslay a Mbərom a mə slala cuwḅe a kutok, a ndav anan sa pak way sə tasa anahan pa nga mburom. Dungo a ndəray tə məgalak a kwa ahay pa man sə njahay ana Mbərom a wa, ù doh sə mazlaḅ anahan a wa, a wa: «Həna nà, kə ndəvak coy kutok!»

18 Cəna, cœrœd, Mbərom a wuted, tanday a dac apan hohum hohum, aday daliyugo a ḅal tə məgalak awan. Kwa pə ana Mbərom sə ndakay dō ahay pə daliyugo nà, hus ahay həna, kula daliyugo kə ḅəlak matanan bay.

¹⁹ Cəđak, daliyugo a ta i zek wa. Wulen su doh a məduwen ata a gəzla i zek wa maakan re. Wulen su doh sə daliyugo ahay fok tə mbəzłak, tə nəsek. Natiya kutok, Mbərom a may anan ahay à nga inde ləbara ana Babila, wulen su doh a məduwen ata awan, a varan tasa sa ga apan mível anahan ata ma rah a ledleđ tə mahay awan, aday á sa anan wa nə fok.

²⁰ Kon aya aday a'am sə bəlay a van atan nga ataya fok, tə ndərmađak à a'am inde. Bəzłom ahay đukwen tə dafasak fok cite re.

²¹ Lanja dugulom aya kawa məndađ a pəkay ahay mbortoto bayak a pə đo ahay. Anga nan, đo ahay tə gənanan anà Mbərom, anga iven sə lanja ata kə gəđak đəce nə ndəlekeke bayak awan.

17

Atə uwar tə zizək

¹ Pə dəđa anahan a wa nə, đo kərtek à wulen sə maslay a Mbərom a cuwbe sa ban tasa ahay cuwbe à alay inde ataya, a nay, u jo: «Hayak, ni đakak anan sariya ana Mbərom sa gan anà uwar a sa ján uho tə đo ahay so ata awan. Winen nə, wulen su doh a ma han a pə cakay sə zlınder ahay ata awan.

² Bahay sə daliyugo ahay ta gak məđigwed tə winen, aday đo sə daliyugo ahay bayan a tə vawak nga ta sə nahay tə winen a re.»

³ Apasay Cəncan awan, a nay ahay upo, a ban nen, aday maslay a Mbərom ata a zla nen à saf inde. A man ata awan, nə canan anà uwar a inde, winen ma ján a pə zizək a inde, a ca đəzđaz. Nga anahan ahay cuwbe, aday ləkam ahay apan kuro re. Zek anahan a fok đukwen mə vinde apan nə,

sləmay lelibay aya dəkdek, sə gənanan anan anà Mbərom.

⁴ Uwar ata ite nà, zana anahan pi zek dəzdaz kawa zana vavize awan, way sə sləmay anahan inde sə gura, aday kon lele aya pi zek tə mədine ahay inde apan re. Tasa sə gura dukwen inde à alay anahan, aday way lelibay aya uda teppe, mə rəbas aya vərekeke, kawa sa ja nà, mer su way anahan sa ga lelibay ataya awan.

⁵ Sləmay inde mə vinde pi jœr anahan, aday sləmay ata nà, a dəkay a way mi dər a inde həna: «Nen Babila, wulen su doh məduwen awan. Nen may sə uwar sə nahay tə dō ahay so ataya føk, aday nen may su dō huwan aya føk re.»

⁶ Aday nə canan bine siwaw nà, uwar ata kà sak mez su dō a Yesu ahay ma vad aya anga tə dəkay anan sləmay a Yesu cərkəke ataya awan. Aday uwar ata kə vawak nga tə mez a tinen ata awan.

Nə canan matanan cəna, u go masuwayan.

⁷ Maslay a Mbərom ata u jo, a wa: «Sa gak masuwayan nə maw? Ni dəkak anan way a mi dər a pə uwar ata tə zizœk a sə gəba anan, winen tə ləkam aya kuro pa nga ahay cuwbe ata awan.

⁸ Zizœk a iken sə canan ata nà, abay winen tə sifa awan, əna həna nà, kə məcak. Azanan nə i jənay ahay à məke sə mərda wa. Kà sak a jənay ahay wa cəna, Mbərom i lize wa sə coy a kutok. Do aday sləmay a tinen inde mə vinde à dərewel su dō tə sifa aya inde itəbay, kwa sə ndakay anan daliyugo ata føk, ti canan anà zizœk ata nà, i gan atan masuwayan. Anga abay winen tə sifa awan, aday həna winen ma mac awan, aday pa 'am mənjoek dukwen i i may ahay tə sifa asa re.»

⁹ U jo asa, a wa: «Lele nà, dɔ ahay tâ njad kəlire sa san way a anan. Nga ataya cuwbe nà, ta ga minje tə bəzłom ana uwar ata sə njahay apan ataya awan. Aday dukwen, a ga minje tə bahay ahay cuwbe re.

¹⁰ A wulen sə bahay ataya dukwen, dara aya nà, tə məcak coy. Bahay mə slala mbərka nə winen inde həna bahay awan. Əna bahay mə slala cuwbe a ite nà, alay a anahan kà slak fan bay. Alay anahan a â sla dukwen, i njahay bayak a bay.

¹¹ Zizøk ata ite nà, abay winen tə sifa awan, aday həna winen tə sifa sabay asa, ata winen a dukwen bahay a mə slala jəmaakan awan. Bahay ata dukwen tinen pə kərtek a tə bahay a cuwbe ataya awan. Kà sak a sləray ahay asa nà, Mbərom i lize wa sə coy a kutok.

¹² «Ləkam a kuro iken sə canan ataya nà, ta ga minje tə bahay ahay kuro ti nay ahay mba, bina ta gak bahay fan bay. Ti i njad cəved sa ga bahay a mba, aday ti ga bahay a nə jiya tatə zizøk ata awan, əna ti njahay bayan a bay.

¹³ Bahay ataya kuro dukwen, tinen kərtek a i mer su way a tinen inde. Aday ti varan məgala a tinen tə mazlaḅ a tinen anà zizøk ata aday â ga anan bahay anahan.

¹⁴ Ti ga vəram tə wan sə təman, aday wan sə təman ata i mbasay patan, anga winen Bahay sə zalay bahay ahay fok. I mbasay patan, winen tu dɔ anahan a mə ngamay ataya awan. A walay atan, aday ti pərahan azar tə mivəl kərtek awan.»

¹⁵ Maslay a Mbərom ata u jo asa, a wa: «Uwar a sa ján uho tə dɔ ahay so ata nà, winen mə njahay a pə cakay sə zlinder aya iken sə canan ataya awan. Zlinder ataya nà, ta ga minje tu dɔ sə zaav ahay fok,

ta 'am ahay fok, tə slala ahay fok, aday tu kon ahay fok re.

¹⁶ Ləkam a kuro iken sə canan ataya, aday tə zizək a iken sə canan ata nà, ti ma nga sa nan ide anà uwar a sa ján uho tə dó ahay so ata awan. Ti ngəzar panan way anahan ahay fok à alay wa, aday i njahay zek kəriya slokwitor a, ti rac sluwed si zek anahan, ti lize anan tə uko.

¹⁷ Bahay a kuro ataya ta ga matanan nà, anga Mbərom a daf abayak nga ata à mivel a tinen inde. Natiya, 'am a zlan atan pi zek anà bahay ataya sə varan məgala sə bahay a tinen anà zizək, hus pə luvon a aday 'am a Mbərom ma ja aya ti ndav wa coy ata awan.

¹⁸ Uwar a iken sə canan ata ite nà, a ga minje tə wulen su doh məduwen a sə lavan nga anà bahay sə daliyugo ahay fok ata awan.»

18

Mbərom a gan sariya anà wulen su doh sə Babila

¹ Pə dəba anahan a wa kutok, nə canan anà maslay a Mbərom hinen inde, winen apan i dazay ahay à mburom wa. Məgala anahan inde bayan awan, jiyjay sə mazlaḅ anahan đukwen a dəvan anà daliyugo fok.

² A zlah tə məgalak awan, a wa: «Coy! Wulen su doh a sə ngaman Babila ata kə slahak, Babila kə slahak dezdezez! Wulen su doh ata kə rahak tə apasay lelibay aya awan, apasay huwan aya, aday tə məvuhom ma ga mənjadak aya* cara cara tinen ma rah a à wulen su doh ata inde re.

* **18:2** Minje kawa zənzen, mugudok, ngahak, kəzkez. Ca pə Tooktaaki Tawreeta 14.3-21.

³ Anga winen kə varak anan mahay anà dō su kon ahay fok aday tã sa. Asa mahay anahan nà, ubor sa ga mədigwed tə winen awan. Bahay sə daliyugo ahay fok ta gak mədigwed ata awan. Do sa ga masa tə way ahay fok, tə tərak dō sə zlile ahay anga zlile sə mədigwed anahan sa ga ata awan.»

⁴ Nə sləne asa bine maw nà, dungo a ndəray ahay kwa à mburom wa, a wa:

«Kwanay dō uno ahay, hayak ikwen ahay à wulen su doh ata wa,
 anga aday kə limen anan alay anà ines a tinen ataya bay,
 kɪ gen dəcə kawa tinen bay re.

⁵ Hayak ikwen ahay à wulen su doh ata wa,
 anga ines anahan ataya dɸukwen tə dəzlek zek jəgenegene hus pa man sə idə a Mbərom,
 aday Mbərom awan, a may anan ines ana Babila ataya à nga inde re.

⁶ Gen anan nə kawa anahan a sa gak ikwen ata cite. Gen anan adəka nà, si sə zalay mbala anahan ata məcapar cew awan.

Kak winen kə varak ikwen mahay gəzlaway zet nà, viren anan uda kawa anahan ata awan,
 əna məgala mbala a kwanay à zalay anahan məcapar cew awan.

⁷ Kə pəlak anjahay sə mazlaɓ tə zlile a nə cəvedabay. Matanan bənen anan mbiyed nə bayak a kutok,
 à ga dəcə dɸukwen matanan re, kawa winen ù doh sə məsinde.

Aday nà, a wa: “Nen bahay, nen mə njahay a pa man sə njahay sə bahay uno lele.

Nen mədukway sə uwar bay, ni yam ma ite anaw,
 anga mbaz uno inde kə məcak ibay.”

⁸ Anga nan kutok, mægara ahay ti tan à nga nè
luvon kærtek: amac, ayam, aday may re.

Ti vak anan tē uko, anga Bahay Mbərom a sa gan
sariya ata nà, winen mægala awan.

⁹ «Bahay sê daliyugo ahay sa taa japay tē winen
pə ubor, aday pa sa ján uho tē winen ataya fok, ti
yam tongof tongof, anga ti canan anà jinjek sê uko
ata awan.

¹⁰ Ti tavay dären, anga zlawan sê dāce mēduwen
ataya i gan atan. Aday ti ja à wulen a tinen:

“Wuna, wuna!

Babila, iken wulen su doh mēduwen awan,

Babila iken wulen su doh mægala ata, iken
inde sabay!

Kə lizek à ler kærtek inde ca!

Matanan, Mbərom kà gak anak sariya coy.”

¹¹ «Do sa ga masa tē way ahay dukwen ti yam, ti
ja mawa, anga dōwan saa sukom way a tinen ahay
nà, inde sabay:

¹² way kawa gura, dala, kon lele aya awan,
mēdine ahay; zana kataw aya awan, zana dəzdəz
aya awan, zana kwedekkwedek aya awan, zana
vavize aya re; dədom sē rəbas lele aya awan, aday
way mē ndakay aya ta slan sē mbəle ataya awan,
aday way mē ndakay aya tē dədom masa a da
'am ataya re; azar aya dukwen mē ndakay aya tē
dangwa, tē rəslom, aday tu kon mē rəba aya awan;

¹³ kemsire lele aya awan, amar sa ga pi zek ahay,
wurde sē ngaman *mira* ata awan, wurde sa vak
avavak ahay; mahay, amar sē ile; ndaw, nuko sa
ndaw; sla ahay, tēman ahay, pəles ahay, muta sē
pəles ahay; bīle ahay, aday sifa sē dō ahay fok,
dōwan saa sukom way ataya nà, inde sabay.

14 «Natiya, dɔ sa ga masa ahay ti jan anà wulen su doh ata, natiya: “Way anak a sa ga anan ti zek ataya fok tə lizek. Zlile anak, way sə ndakay zek anak, fok tə lizek. Kula ki njadʹ atan sabay.”

15 Do sa njadʹ zlile ta sa ga masa sə way ataya ti tavay dären pə wulen su doh wa, anga dæce anahan ataya a gan atan zlawan. Ti ma nga sa yam, sa ja mawa nə bayak awan.

16 Ti ja: “Waay, waay! Babila, wulen su doh mæduwen awan, abay a taa pak pi zek nə zana aday kwedekkwedek aya, zana dæzdaz aya, aday zana vavize aya bidaw? Winen mæ ndærkesl a nə tə way sə gura ahay, tu kon sə masa lele aya awan, aday tə mædine ahay re.

17 Way ataya fok tə lizek à ler kærtek a inde ca!”

«Do sə kwalalan ahay pi zek tə bahay nga a tinen aya tæke, tatə dɔ sa bar tə kwalalan ahay, ti tavay dären cite re.

18 Ti canan anà jinjek sə uko sa vak anan wulen su doh ata nà, ti zlah, ti ja: “Kula wulen su doh inde mæduwen a kawa həna anan nà, ibay!”

19 Ti ra yugo, ti pak pi zek tə ayam awan†, ti ja mawa tə ayam awan: “Waay, waay, Babila, wulen su doh mæduwen awan! Do sə kwalalan ahay pa nga sə bəlay fok ta ga zlile nà, tə winen a bidaw? Way anahan ahay fok tə lizek à ler kærtek inde ca!”

20 Natiya kutok, kwanay dɔ sə mburom ahay, tislən mivəl, anga wulen su doh ata kə lizek. Kwanay dɔ a Yesu ahay, dɔ maslan a Yesu ahay, dɔ maja'am a Mbərom ahay, tislən mivəl, anga Mbərom kə mak anan anan gəsikedʹ anahan, kawa

† 18:19 Aga tinen ta yam məsinde nà, ta ra yugo pi zek.

Babila sa gak ikwen ata awan.»

²¹ Kagasl kutok, maslay a Mbərom məduwen a hinen inde, a zla, a gəba van məduwen awan, a lar anan à bəlay inde dəzlez, a wa: «Ti lar anan Babila wulen su doh a məduwen ata dukwen, kətanan. Dowan i canan kula sabay.

²² Ara su do sa fa gənjaval ahay, sa fa məzləzlilen ahay, sa fa cicək ahay, aday tə ara su do sa fa sləlem ahay i ga inde à Babila sabay. Dowan i canan anà do sa han way ahay, do sə ndakay way ahay fok sabay. Dowan i sləne aɓal ana wan sa van pa van à Babila sabay.

²³ Dowan i canan anà jiyjay sə uko sə lalam à Babila sabay. Dowan i sləne ara su do sə gəba dalay ahay à Babila sabay fok. Ayaw, do sa ga masa ahay à Babila nà, tə zalay do sə daliyugo ahay fok tə mazlaɓ. Əna, kə njəkak anan do su kon azar ataya ta sa ga masuwayan anahan ahay cara cara pə daliyugo fok.

²⁴ Mez su do a maja'am anahan ahay, pi zek tə mez anà do a Yesu ahay ma pak awan, à wulen su doh ata awan. Aday asa, mez sə do ahay ma pak a pə daliyugo fok ata nà, pa nga ana Babila awan. Mbərom a gan sariya anà Babila nà, matanan.»

19

¹ Pə dəba anahan a wa kutok, nə sləne awan a inde kawa dungo sə do ahay bayan a à mburom, winen apan i ja, a wa:

«Həren anan nga à Mbərom!

Anga Mbərom a mənuko nə do sa tam do,
mazlaɓ nə pə winen,
məgala anahan inde.

² Mbərom a ga sariya dukwen tə cəved awan, aday
tə dīdem a re.

Kà gak anan sariya anà uwar sa ján uho tə do ahay
so ata awan.

Sa nes anan daliyugo fok tə mədigwed nà, winen a
re.

Mbərom kà gak anan sariya anga kə vədak anan
anan do si mer su way anahan ahay.»

³ Ta ja asa:

«Həren anan nga anà Mbərom!

Anga jinjek sə uko sə dəroz à wulen su doh ata wa
nà, i ndav kulibay,

i dəroz wa nə pa sə viyviya awan!»

⁴ Natiya kutok, məced ahay kwa kuro cew nga
fudo pi zek tə awan a fudo tə sifa ataya, tə dukwen
gərmec ù vo anà Mbərom a mə njahay a pa man sə
njahay sə bahay anahan ata awan. Do ataya ta wa:
«Amen, matanan! Həren anan nga anà Mbərom!»

Azar uko sə gəba dalay ana wan sə təman

⁵ Cəna, nə sləne 'am a ndəray ahay kwa à man sə
njahay sə bahay a Mbərom wa, a wa:

«Həren anan nga anà Mbərom a nuko,

kwanay do si mer su way anahan ahay,

do sə jəjəran ahay,

məced ahay pi zek tə gwaslay aya təkə fok.»

⁶ Nə sləne asa abəbal awan sə man su do
məduwen awan, kawa zəlaka sə dazay pə pəkərad
à zylinder ata awan, kawa Mbərom sa dac tə
məgalak ata awan. Nə sləne nà, a wa:

«Həren anan nga anà Mbərom!

Anga Mbərom Ba Məgala, do sə lavak uko nga nə
winen Bahay awan!

⁷ Tasluko mivel, mbasuko pə kərtek awan.

Həruko anan nga, anga məduwen anahan!
 Alay a kà slak, wan sə təman i gəba uwar anahan.
 Dəna ata dukwen kə lavak zek, winen apan i ba.
 8 Tə varak anan zana sə gəba zek kəlfedede aday ma
 dav a herre,
 â pak pi zek.»

Zana anahan a kəlfedede ata nà, mer su way ana
 dō a Yesu ahay sa ga lele aya ata awan.

9 Natiya kutok, maslay a Mbərom ata u jo, a wa:
 «Vinde: Mbərom i daf alay sə mazlaḅ anahan pə dō
 mə ngamay aya à man sə azar uko sə gəba dalay
 ana wan sə təman ata awan.» Asa, u jo, a wa: «'Am
 a anaya nà, 'am dīdek aya awan, 'am a Mbərom.»

10 Nə sləne 'am ata cəna, nə dukwen gərmec pə
 saray anà maslay a Mbərom ata awan, əna u jo,
 a wa: «Kâ ga matana sə dukwo gərmec ù vo bay.
 Nen dukwen dō si mer su way kawa iken, aday
 kawa mərak anak azar aya sa ga side pə Yesu
 ataya re. Dukwen gərmec ù vo nà, anà Mbərom!»
 Anga sə varan məgala anà dō maja'am a Mbərom
 ahay dukwen, side sə dakay anan 'am ana Yesu ata
 awan.

Do sa ján pə pəles kwedekkwedek awan

11 Kagasl, nə canan anà mburom mə təba awan,
 aday pəles a inde à man ata kwedekkwedek awan.
 Dəwan a ma ján a apan ata nà, tə ngaman nə dō ma
 daf nga awan, aday dō dīdek a re. A ga sariya, aday
 a ga vərəm nà, tə cəved awan.

12 Ide anahan ahay ta dav nə kawa miresl sə
 uko. Jugo sə bahay ahay inde anan à nga nə
 bayak awan. Aday dukwen, sləmay anahan inde
 mə vinde apan, əna dəwan a san anan bay, si zek
 anahan awan.

13 Zana anahan pi zek nà, dəzɔfəz tə mez awan. Tə ngaman nə 'Am a Mbərom.

14 Do sa ga vəram anahan ahay fok tə pərahan azar à mburom wa, tinen a fok ma ján aya pə pəles kwedekkwedek aya re. Zana a tinen pi zek dukwen kəlfedede aya dəkdek, aday ma dav aya herre re.

15 Mbeet, maslalam ma pa awan, a zləray ahay à 'am anahan wa. I mbasay pə do manide anahan ahay pu kon pu kon nà, tə winen awan. I təra bahay tə məgala awan, pa nga su kon ahay. I zlaɔ atan kawa do sa zlaɔ wan si sé à kudom inde ata awan. Way ata dukwen, aga mivel ana Mbərom Ba Məgala.

16 Sləmay inde mə vinde pə zana anahan, aday pə gos anahan natiya: «Bahay sə zalay bahay ahay fok.»

17 Aday nə canan ayak anà maslay a Mbərom hinen, winen mə tavay a pa pac. A ngaman ayak anà məvuhom sa nga mburom ahay fok tə məgalak awan, a wa: «Hayak ikwen ahay, anga dī halay nga sa pa daf sə azar uko ana Mbərom.

18 Hayak ikwen ahay, rəcen sluwed si zek sə bahay ahay, sə bahay nga sə suje ahay, ta sə suje aya awan, aday sluwed sə pəles pi zek tə sluwed su do sa ján pə pəles ataya təke, aday tə sluwed sə do ahay fok: sluwed su do su kon ahay ta sə bile ahay, sluwed su do məced aya ta sə gwaslay aya təke.»

19 Aday nə canan anà zizœk ata kutok, anà bahay sə daliyugo ahay pi zek tə suje a tinen aya təke, tə halay nga sa ga vəram tə dowan a ma ján a pə pəles a kwedekkwedek ata, pi zek tə suje anahan ahay ite re.

²⁰ Ta ban anan zizœk ata, aday tə jaway anan, winen tu dō maja'am ana Fakalaw sa ta ga masuwayan pa 'am anahan ata awan. Tə masuwayan ataya dukwen kə njækak anan dō ahay aday tē tēma vivay ana zizœk ata pi zek a tinen, tē həran nga anə pəra sa ga minje tə winen ata re. Natiya, ta ban anan zizœk ata tu dō maja'am ana Fakalaw ata nà, ta lar atan à dəlov sə uko inde tə ide aya awan. Dəlov sə uko ata nà, ma han a nə tə mətətək sə uko.

²¹ Suje ana zizœk ataya nà, dōwan a pə pəles kwedekkwedek ata a vad' atan nə tə maslalam sə zləray à 'am anahan wa ata awan. Məvuhom sa nga mburom ahay føk tə rahak tə sluwed' su dō ataya tœhœhœ.

20

Fakalaw i ga ava mbulo à dangay

¹ Aday nə canan anə maslay a Mbərom inde, winen apan i dazay ahay à mburom wa. Lakile sə təba məsudah sə məke sə mərda ata, inde à alay anahan, aday calalaw ma ba awan, inde à alay anahan re.

² Maslay a Mbərom ata a ban anan zizœk a kawa gədam a məduwen ata awan. Zizœk ata nà, winen dədew sə njəkan uda anə dō ahay kwakwa way anahan, winen nə Fakalaw. Maslay a Mbərom ata a jaway anan sə ava mbulo,

³ aday a lar anan à məke sə mərda ata inde kutok. A tacan a 'am tə lakile, aday a tapay anan tə mətətək, anga aday à saa ma apan sa njæk anan dō su kon ahay sabay, hus pə ava mbulo ata sa ndav. Ava ata kə ndəvak nà, ti i mbəsakay anan mənjoek asa re.

⁴ Pə dəba anahan a wa nà, nə canan anà man sə njahay sə bahay ahay. Mə njahay aya apan ataya nà, do aday Mbərom a varan atan cəved sa gan sariya anà do ahay ataya awan. Nə canan anà sifa su do ma mac aya awan. Tinen, ma car aya tə tirez, anga tə dəkay anan ləbara ana Yesu, aday anga tə wazay anan 'am a Mbərom re. Do ataya nà, tə dukwek anan gərmec ù vo anà zizœk tə pəra anahan ata itəbay. Tə təmahak lamba sə sləmay anahan pi jœr a tinen ahay itəbay re. Kwa pə alay a tinen dukwen, vivay sə lamba anahan inde patan ibay. Tinen tə slabakak ahay à məke wa, ta ga bahay tatə Yesu Almasihu ava mbulo.

⁵ Wita nà, aslabak à məke wa mama'am awan. Do azar aya nə tə slabakak ahay ite fan bay, hus ava mbulo ata i ndav aday.

⁶ Ataslay mivel i təran anà do a saa slabakay ahay à məke wa à aslabak a mama'am ataya awan, anga tinen do ma gan nga aya anga Mbərom. Amac mə slala cew awan, i mba patan sabay. Ti təra adəka nà, do sa ga mer su way ù doh sə mazlaḅ a Mbərom, anga Mbərom aday anga Yesu Almasihu re. Ti ga bahay tə Yesu Almasihu ava mbulo.

Mbərom kà mbasak pə Fakalaw

⁷ Fakalaw kà sak a va mbulo à məke sə mərda ata inde nà, ti mbəsakay anan uho asa.

⁸ Kə jənak ahay à məke wa cəna, i zla saa njak anan do su kon ahay pə daliyugo fok asa, kawa sa ja nà, atə Gog tə Magog.* Fakalaw i halan nga anà

* 20:8 Ca pə Ejekiyel 38 - 39.

đo ahay pə kərtek awan, sa ga vəram tə Mbərom. Tinen nà, mə wasay aya kawa wiyen sə zlinder.

⁹ Nə canan atan nà, tinen mə ndire zek aya awan, ta zla kwa ta sə wura fok pə daliyugo, aday ta van nga anà man ana đo a Yesu ahay mə njahay aya uda ata awan, kawa sa ja nà, Urəsalima, wulen su doh ana Mbərom a sə pəlay anan ata re. Ta van nga lele cəna, uko a dazay ahay à mburom wa, a vak atan fok.

¹⁰ Zek ana Fakalaw a sa taa njak atan ata nà, ta ban anan, aday tə larak anan ayak à dəlov sə uko ata inde. A man ata dukwen nà, mətətək sə uko winen apan i ban. Ba tə larak anan ayak zizək tu đo maja'am ana Fakalaw ata à man ata kurre. Dəce à man ata a ndav itəbay, luvon tə ipec fok, aday pa sə viyviya awan.

Sariya mədakwidok awan

¹¹ Natiya, nə canan anà man sə njahay sə bahay məduwen a aday a ca kwedekkwedek. Dowan a inde, winen mə njahay a apan. Daliyugo pi zek tə bagəbaga mburom a, ta haw pa 'am anahan wa sə coy awan. Dowan i canan atan kula sabay.

¹² Aday nə canan anà đo ma mac aya awan, məced ahay tə gwaslay aya təke fok, mə tavay aya pa 'am ana man sə njahay sə bahay ata awan. Deftere ahay inde, həna mə təba aya awan. Deftere hinen inde, mə təba a re. Winen nà, mə vinde uda nə sləmay su đo tə sifa aya awan. Mbərom a gan sariya anà đo ma mac ataya awan, kuwaya pi mer su way anahan ma ga aya aday mə vinde a à deftere ataya inde ata awan.

¹³ A'am a vənihey anan dɔ sa mac à a'am inde ataya awan. Amac pi zek tə Məke, tə vənihey anan dɔ a tinen ma mac aya fok. Mbərom a gan sariya anà dɔ a ataya fok, kuwaya pi mer su way anahan ma ga aya fok re.

¹⁴ Ta lar anan Amac pi zek tə Məke à dəlov sə uko ata inde. Dəlov sə uko ata nà, amac mə slala cew ata awan.

¹⁵ Kak dɔwan a nə sləmay anahan inde à dərəwel su dɔ tə sifa aya ata bay cəna, ta lar anan nə gem à dəlov sə uko ata inde re.

21

Bagəbaga mburom wiya awan, tə daliyugo wiya awan

¹ Cəna nə canan anà bagəbaga mburom wiya awan, tə daliyugo wiya inde re. Bagəbaga mburom məduwer ata tə daliyugo məduwer ata tə lizek, bəlay dʊkwen kə lizek re.

² Nə canan ayak anà wulen su doh cəncan awan, winen Urəsəlima wiya awan, winen apan i dazay ahay à mburom wa, pə cakay ana Mbərom wa. Winen mə ndakay zek a dʊkwen kawa dəna dalay a i zla à mbaz ata awan.

³ Nə sləne dʊngo a ndəray ahay kwa à man sə njahay sə bahay wa, a ja tə məgalak awan, a wa: «Həna nà, man sə njahay a Mbərom, winen à wulen sə dɔ ahay inde. I njahay tə tinen, aday ti təra dɔ anahan ahay. Zek a Mbərom a dʊkwen i ga inde à wulen a tinen, winen Mbərom a tinen.

⁴ I takad patan wa idə sə ayam a tinen ahay fok. Amac inde sabay, ayam inde sabay, dəcə inde sabay re. Way məduwer aya fok nà, tə ndəvak sə coy.»

⁵ Kagasl, dowan a mə njahay a pa man sə njahay ata, a wa: «Həna nə, ni mbəda anan way ahay fok, aday way ahay ti təra nə wiya aya awan.» U jo i nen a kutok, a wa: «Vinde anan, anga 'am a anaya nə, didek aya awan, aday 'am sa dəf apan nga ahay re.»

⁶ A pərahan azar ta su jo asa, a wa: «Mer su way a anan dukwen kə ndəvak. Sə dazlan anə way ahay fok nə, nen awan. Aday saa ndav anan wa way ahay fok dukwen, nen a re. Jom kə gak anan anə dowan a cəna, ni varan a'am kəriya awan, ə kurok sa var sifa wa.

⁷ Do saa mbasay pə dəce ata nə, ni varan anan way ataya fok. Ni təra Mbərom anahan, aday i təra wan uno.

⁸ Əna, do aday a nan sə pəruho azar bay anga zlawan a gan atan ataya awan, do sa dəf upo nga sabay ataya awan, do sa ga way mənjadək aya awan, aday do sa vad nga su do ahay, do sa dah uho ahay, do sa ga maram ahay, do sə tawal pəra ahay, aday do sa gad mungwalay ahay dukwen, man sə njahay ana do ataya fok nə, ə dəlov sə uko a pi zek tə mətətok sə uko ata inde. Way ata nə, amac tə slala cew a kutok.»

Urəsalima wiya awan

⁹ Maslay a Mbərom a inde, a nay ahay pə cakay uno kutok. Winen do kərtek ə wulen sə maslay a Mbərom a cuwbe sa ban tasa ahay cuwbe ə alay inde ataya awan. Tasa a tinen ahay nə, ma rah aya tə dəce mədakwidok aya cuwbe ite re. Dowan ata u jo: «Zlumo, ni i dəkak pə dəna aday wan sə təman i i gəba ata awan.»

¹⁰ Apasay a Mbərom a nay ahay upo, a ban nen, aday maslay a Mbərom ata a gəba nen pa nga sə bəzlom zəbor a aday sololo ata awan. U ko anan Urəsəlima, wulen su doh a cəncan ata awan, winen apan i dazay ahay pə cakay ana Mbərom à mburom wa.

¹¹ A dav nə pəzlad pəzlad lele tə jiyjay sə mazlaḅ a Mbərom awan. A wuted kawa kon lele aya aday mə rəba aya ata awan, zeziye aday ide cərwa kawa malam.

¹² Zled məduwen a a van nga tew fok. Məsudoh ahay inde apan nə kuro nga anahan a cew. Aday maslay a Mbərom ahay kuro nga anahan a cew dukwen, tinen apan ti ba pə məsudoh a kuro nga cew ataya re. Sləmay sə zahav sə Isəra'ila ahay kuro nga anahan a cew dukwen mə vinde aya apan.

¹³ Məsudoh ahay maakan tə day sə dəlon, maakan tə day sə mburom, maakan tə day sə walay, aday maakan dukwen tə day sə wundala.

¹⁴ Zled sə wulen su doh ata nə, saray a ma pak a dukwen tu kon ahay kuro nga anahan a cew, aday sləmay su do maslan ana wan sə təman ahay kuro nga anahan a cew mə vinde aya apan re.

¹⁵ Maslay a Mbərom a su jo ahay 'am ata nə, way sə lavay way inde à alay anahan, anga sə lavay anan wulen su doh, tə məsudoh anahan aya təkə, aday ti zled anahan a təkə re. Way sə lavay way ata dukwen, mə ndakay a sə gura.

¹⁶ Wulen su doh ata nə, day anahan aya fudo fok, tə lavay ike hedək hedək. Maslay a Mbərom ata a lavay anan wulen su doh tə way sə lavay way anahan ata kutok. Day anahan a kərtek a

nà, kilomiter mbulo cew tã sãkat cew (2 200).* Day anahan aya ðukwen, tã lavay ike tã zãbor sã mburom ata awan.

¹⁷ A lavay anan zlef sã wulen su doh ata awan. Zãbor sã mburom anahan nã, miter kwa kuro cuwbe nga anahan a cew (72)†, kawa alavay way a mænuko.

¹⁸ Zlef sã wulen su doh a nã, mi ðezl a tu kon sã ngaman *yaspa* ata awan. Əna zek a wulen su doh a ite nã, mi ðezl a tã gura, aday ide cãrwa kawa malam.

¹⁹ Kon sã saray su doh ataya kuro nga cew nã, tinen mã ndakay aya tu kon mã rãba aya cara cara. Kon kãrtek a nã mã ndakay a tã *yaspa*, hinen tã *safira*, hinen tã *agate*, hinen tã *miradi*,

²⁰ hinen tã *onikis*, hinen tã *sardis*, hinen tã *kirisolit*, hinen tu kon zeziye awan, hinen tã *topas*, hinen tã *kirisoparasu*, hinen tã *lipilar*, aday hinen tã *ametistu*.‡

²¹ Way sã tacay 'am su doh aya kuro nga anahan a cew ataya ðukwen, tinen nã mãdine ahay kuro nga anahan a cew ite re. Aday ðukwen, way sã tacay mãsudoh kãrtek fok, mãdine kãrtek coy. Cãved sã wulen su doh mãduwen ata ðukwen, winen mã ndakay a tã gura aday ide cãrwa kawa malam ata awan.

²² A wulen su doh ata nã, nen nã canak anan anã doh sã mazlaþ a Mbãrom sabay, anga Bahay Mbãrom, Ba Mãgala, ta wan sã tãman, sã tãra doh sã mazlaþ a Mbãrom nã, tinen awan.

²³ Wulen su doh ata ðukwen a gan may anã pac kabay kiya saa dav uda sabay, anga jiyjay

* **21:16** Kawa sa ja nã, «stadi» 12 000. † **21:17** Kawa sa ja nã, «cukulek» ahay 144. ‡ **21:20** Kon ataya nã, inde àga mænuko ibay.

sə mazlaḅ a Mbərom winen apan i dav uda coy. Lalam sa man ata dukwen, wan sə təman awan.

²⁴ Do su kon ahay fok, ti zla nà, à jiyjay anahan ata inde. Bahay sə daliyugo ahay dukwen ti zlak ayak tə zlile a tinen ahay uda awan.

²⁵ Məsudoh sə wulen su doh ataya nà, tə tacay atan itəbay, anga luvon a ga à man ata bay.

²⁶ Məgala a pi zek tə zlile su kon ahay fok ti halak anan ayak à man ata awan.

²⁷ Way mənjadak aya fok nà, ti dəzle uda itəbay. Do sə mungwalay ahay tu do sa ga ines ahay, ti njad sa zla uda itəbay re. Saa zla uda cəna, do aday sləmay anahan mə vinde a à dərəwel su do tə sifa aya, mbala ana wan sə təman sə lavay ata awan.

22

¹ Cəna, maslay a Mbərom ata u ko anan zlin-der sə a'am sa var sifa a inde, ide cərwa kawa malam, aday a zləray ahay à man sə njahay ana atə Mbərom ta wan sə təman ata wa.

² A'am sə zlinder ata a haw à wulen su doh inde à mamasl sə cəved məduwen ata awan. Pa 'am zlinder ata ta day cew maya fok, sé sə varan sifa anà do ahay ma zav a inde patan. Sé ata a wahay saray kuro nga cew à ava daz inde, pə kiya pə kiya fok saray kərtek. Daslam anahan a dukwen, disise sa mbar anan do su kon ahay fok à dəvac a tinen ahay wa.

³ Atahasl do i ga inde à wulen su doh ata sabay. Man sə njahay sə bahay ana atə Mbərom tə wan sə təman i tavay uda sə coy.

Natiya, do si mer su way ana Mbərom ahay ti həran nga à man ata awan.

⁴ Ti canan anà ide a Mbərom awan, aday sləmay anahan i ga inde mə vinde pi jœr a tinen ahay.

⁵ Luvon a ga à man ata sabay, ta gan may anà lalam bay, ta gan may anà pac sabay re, anga mazaḷ a Mbərom Ba Məduwen i dəvan atan. Tinen nà, ti ga bahay tə winen pa sə viyviya awan.

⁶ Cəna, maslay a Mbərom ata u jo, a wa: «'Am a anaya nà, didek aya awan, aday 'am sa đaf apan nga ahay re. Mbərom Ba Məduwen, do sə varan ahay Apasay anahan Cəncan a anà do maja'am anahan ahay ata, a sləmay ahay maslay anahan anga aday â đakan anan anà do si mer su way anahan ahay way a sa naa təra bəse ataya awan.»

Yesu i may ahay

⁷ Yesu a ja, a wa: «Pəken sləmay, ni mak ayak bəse! Ataslay mivél inde anga do sə đəfan apan anà way a mə vinde à đerewel a anan inde ata awan, anga sə đakay anan nə zek a Mbərom awan.»

⁸ Nen Yuhana, nen nà, do sə sləne aday sə canan anà way a anaya awan. Nə sləne anan aday nə canan lele nà, na ma nga sə dukwen gərmec ù vo anà maslay a Mbərom a sə đuko anan way ataya fok, aday ni həran nga.

⁹ Cəkəbay, winen a dukwen u jo, a wa: «Kâ ga matanan bay! Kâ həro nga bay. Anga nen dukwen do si mer su way a Mbərom kawa iken a re, aday kawa mərak anak do maja'am a Mbərom ahay azar aya sə đəfan apan anà 'am a mə vinde à deftere a anan inde ataya awan. Həran nga nà, anà Mbərom a đəkđek.»

10 U jo asa, a wa: «Kâ saa ðer anan way a iken sə vinde à ðerewel inde anaya pə ðo ahay wa bay, anga alay sə way anaya i təra bəse coy.

11 Do sə huwan, â zəga anan apan huwan anahan. Do mənjadak awan, â zəga anan apan sa ga mənjadak anahan re. Do sa ga sumor, â zəga anan apan sumor anahan ata ite re. Aday ðo sə cəncan ite ðukwen, â zəgahan alay anà cəncan anahan ite hwiya.»

12 Yesu a ja, a wa: «Pəken sləmay, ni mak ayak bəse! Ni zlak anan ayak magwagway à alay inde. Kuwaya i njad nà, təðe pi mer su way anahan a sa ga ataya awan.

13 Sə dazlan anà way ahay fok nà, nen awan. Aday saa ndav anan wa way ahay fok ðukwen, nen a re. Nen ðo mama'am awan, aday nen ðo mədakwidok a re.

14 «Ataslay mivel inde anga ðo sə banay anan rəkot a tinen ahay ataya awan, anga tinen ti njad sa zla tə məsudoh sə wulen su doh, aday ti pa bumbok i sé sa var sifa anà ðo ahay ataya wa re.

15 Əna, ðo sa ga way sa zlan atan à nga ahay, maram ahay, ðo sa ga mədigwed ahay, ðo sa vad nga su ðo ahay, ðo sə pəra ahay, ðo sa taa gan may sa gad mungwalay ahay nà, ti ka nga à wulen su doh ata inde itəbay jiya awan.

16 «Nen Yesu, nə slənak ayak maslay uno saa ðakak ikwen anan way a anaya awan, kwanay ðo sə egliz ahay cuwəe ataya fok. Nen a aday nà, ðo sa nay à zahav ana Dawuda wa. Nen bəmtay sa dav ata awan.»

17 Apasay Cəncan awan, tə dəle ana wan sə təman a saa gəða ata, ta wa: «Hayak!» Kwanay a sə

slâne 'am a anan ataya dükwen, jen nà: «Hayak!»

Kuwaya, jom a gan anà dōwan a nà, â nay. Kà nak anà dōwan cœna, i tœma a'am sa var sifa hœna kœriya awan.

Mœdakwidok sa 'am ahay

¹⁸ Nen Yuhana nà, nen apan ni gafan 'am anà dō sê slâne 'am a mœ vinde à dœrewel a anan inde ataya fok: Kak dōwan a kœ zœgahak anan apan 'am pœ dœrewel a anan nà, Mbœrom i zœgahan anan apan dœce ahay kawa ana dœrewel a anan sa ja apan ataya re.

¹⁹ Aday kak dōwan a kœ zœbak panan ite, Mbœrom i zœban pœ magwagway anahan ahay wa, kawa ana deftere sa ja apan ataya re. I njad sê njahay à wulen su dœh a cœncan ata bay, i njad sa pa wan si sé sa var sifa anà dō ahay ata bay re.

²⁰ Dōwan a sa san dœdek sa 'am anaya, a ja nà: «Tœ dœdem a, nen ni zlak ayak bœse coy!»

Amen! Yesu Ba Mœduwen, hayak ahay coy.

²¹ Bahay a mœnuko Yesu â gan sumor anà dō sa dœf apan nga ahay fok.

Mbuko: Aḡan 'am wiya awan
The New Testament in the Mbuko language of
Cameroon (CM:mqb:Mbuko)

copyright © 2010 Wycliffe Bible Translators, Inc.

Language: Mbuko

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mbuko

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-14

PDF generated using Haiola and XeLaTeX on 14 May 2025 from source files
dated 14 May 2025

85377c5a-ee2b-5540-a6b5-8f8a5a729092